



05748

通志卷第一

宋 右 迪 功

鄭 四 新 鄭

秦 樵 賈

漁 仲

撰

三皇紀第一

太昊 炎帝 黃帝

臣謹按三皇伏羲但稱氏神農始稱帝堯舜始稱國  
自上古至夏商皆稱名至周始稱諡而稱氏者三皇  
以來未嘗廢也年代則稱紀自開闢至獲麟凡二百七十六萬歲分爲十紀  
厥初生民穴居野處聖人教之結巢以避蟲豸之害  
而食草木之實故號有巢氏亦曰大巢氏亦謂之始  
君言君臣之道於是乎始也有天下百餘代民知巢

通志

卷一

三皇紀一

一

居未知熟食燧人氏出焉觀星辰而察五木知空有  
火麗木則明故鑽木取火教民以烹飪之利號燧人  
氏以夫燧者火之所生也時無文字未有甲歷紀年  
始作結繩之政而立傳教之臺始爲日中之市而興  
交易之道亦謂之遂皇或言遂皇持斗機運轉之法  
以施政教此亦欽若昊天以授民時之義也三皇者  
天皇地皇人皇是也其說不無所取證當取伏羲

爲天皇神農爲人皇黃帝爲地皇之說爲正

其說出三皇太

古書然太昊以明天事故曰太昊炎帝以明民事故曰神農黃帝以明地事故曰黃帝此理甚明伏

羲作連山神農作歸藏黃帝作坤乾易之始自伏羲

三易之本自三皇夏人因連山而作連山商人因歸藏而作歸藏周人因坤乾而作周易八卦具而六十四卦成世言伏羲畫卦文王重之皆沿襲之言也傳曰法始乎伏羲言圖象書契於此乎始三皇五帝三王之事蓋已久矣臣之所志在於傳信其有傳疑者則降而書之以備記載云

太昊伏羲氏亦曰庖犧氏亦曰皇雄氏亦曰天皇伏羲亦作慮犧亦作戲亦作羲或言象日月之明故曰太昊伏羲制犧牛故曰伏犧因取犧牲以充庖廚故號庖犧然去古已遠古人名號難以今義求也伏犧者燧人氏之子母曰華胥履大人之迹於雷澤而孕因風而生故爲風姓伏羲生於成紀作都于陳故陳爲太昊之墟樂曰立基或云扶來繼天而王爲百王先人生之始也與禽獸無異知有母而不知有父知有愛而不知有禮臥則喏喏起則盱盱飢則求食飽則棄餘茹毛飲血而衣皮革伏羲德合上下天應以鳥獸文章地應以河圖洛書仰則觀象於天俯則觀法於地中則觀萬物之宜始作書契以代結繩之政始畫八卦卦有二爻重而爲六十四名曰連山象法乾坤以正君臣父子夫婦之義始作罔罟以佃以漁以贍民用制嫁娶以儷皮爲禮作二十五

絃之瑟服牛乘馬冶金成器本陽氣之始而爲律法本  
五材之用而定五行因龍馬負圖而出于河之瑞故官  
以龍紀而爲龍師乃命子襄爲飛龍氏造六書一曰象  
形二曰指事三曰會意四曰轉注五曰諧聲六曰假借  
使天下義理必歸文字天下文字必由六書命子英爲  
潛龍氏造甲歷起於甲寅日月歲時自此而生又命五  
官春官爲青龍夏官爲赤龍秋官爲白龍冬官爲黑龍  
中官爲黃龍乃升傳教之臺而以甲歷示民命栗陸爲  
水龍氏繁滋草木疏導泉源毋怠於時命混沌爲降龍  
氏驅除民害民安則安民危則危毋怠於民命大庭氏  
主屋廬爲民居虛命陰康氏主水土爲民田里於是共  
工爲上相柏皇爲下相朱襄吳英常居左右朱襄卽子  
襄吳英卽子英也栗陸居北赫胥居南昆連居西葛天  
居東陰康居下分九州之牧而天下化洽在位百十六  
年左氏曰任宿須句顓臾風姓也實司太昊與有濟之  
祀四國伏羲之後歷夏商至周不泯所謂盛德必百世  
祀者

臣謹按言伏羲氏者爲以木德王天下帝出乎震之

義伏羲氏沒女媧氏作是爲女皇春秋世譜云華胥

生男子爲伏羲女子爲女媧故世言女媧伏羲之妹

風姓人首蛇身乘伏羲制度作笙簧張雲幕枚占神明能變化萬物往古之時四極廢九州裂天不兼覆地不周載火熾炎而不滅水浩洋而不息猛獸食精民鷲鳥攫老弱女媧鍊五色石以補蒼天斷鼉足以立四極殺黑龍以濟冀川積蘆灰以止淫水天不足西北故日月移焉地不足東南故百川注焉蒼天神四極正淫水涸冀川平狡蟲死精民生女媧之後有大庭氏有柏皇氏有中央氏有栗陸氏有驪連氏有赫胥氏有盧尊氏有混沌氏有吳英氏有朱襄氏有葛天氏有陰康氏有無懷氏據女媧氏天子也自大庭之後十三氏皆臣於伏羲諸家以爲天子臣每疑此在伏羲時爲諸侯如夏商周在唐虞之世是也不然當伏羲之世分九州牧而理天下各君一方以效其治後世之訛以爲相繼爲天子也或言朱襄之時多風而陽氣蓄積萬物解散果實不實士達作五絃瑟以來陰氣以定羣生葛天之時民俗熙熙其作樂也三人摻牛尾投足以歌八闕一曰載民二曰元鳥三曰遂草木四四奮五穀五曰謹天常六曰達帝功七曰依地德八曰總萬物之極或言自伏羲至無懷千二百六十年自女媧至無懷凡十五君襲庖羲之號

千一百五十年

或云自伏羲至無懷五萬七千七百八十二年自女媧至無懷一萬七千

七百八十七年

臣又按太史公作五帝紀擇其雅言而書臣今紀采諸家之言而以雅馴者爲經其不典之言則列於篇後以備記載非傳信也其誕而野如盤古者則亦不書

炎帝神農氏起於烈山亦曰烈山氏亦曰連山氏亦曰伊耆氏亦曰大庭氏亦曰魁隗氏亦曰人皇少典之元子其母曰女登有蟠氏之女也女登有神龍之感而生神農焉長於姜水故爲姜姓以火德王天下故爲炎帝

通志

卷一

三皇紀一

五

民不粒食未知耕稼於是因天時相地宜始作耒耜教民藝五穀故謂之神農民有疾病未知藥石乃味草木之滋察寒溫之性而知君臣佐使之義皆口嘗而身試之一日之間而遇七十毒或云神農嘗百藥之時一日百死百生其所得三百六十物以應周天之數後世承傳爲書謂之神農本草又作方書以救時疾復演八卦而爲六十四卦名之曰歸藏作都于陳後徙魯以火紀官春官爲大火夏官爲鶉火秋官爲西火冬官爲北火中官爲中火樂曰下謀或曰扶持其俗樸重端慤不忿爭而財足無制令而民從威厲而不殺法省而不煩列

塵於國日中爲市始作五絃削桐爲琴糾絲爲絃以通  
天地之德以合神人之和郊特牲曰伊耆氏始作蜡明  
堂位曰土鼓鼗桴鞀籥伊耆氏之樂也夙沙氏爲諸侯  
不用命箕文諫而殺之神農退而修德夙沙之民自攻  
其君而來歸南交趾北幽都東暘谷西三危是其封域  
也在位百二十年

或云百四十年

臣謹按炎帝之女溺死東海化爲精衛每銜西山木  
石以填東海無雄偶海燕而生今東海畔有衛誓水  
以精衛溺於此川故誓不飲其水一名鳥誓一名冤  
禽一名志鳥俗呼帝女雀又按神農人身牛首納莽

通志

卷一

三皇紀一

六

水氏之女曰聽諗生臨魁嗣神農曰帝臨魁在位八

十年

或云六十年

帝承嗣位六十年

或云六十年一本承在臨魁前

帝明

嗣位四十九年帝直嗣位四十五年帝釐嗣位四十

八年帝哀嗣位四十三年帝榆罔嗣位五十五年諸

侯相侵帝不能正黃帝征之天下尊爲天子炎帝遂

絕自神農至榆罔五百年自臨魁至榆罔凡七帝襲

神農之號三百八十年

呂氏春秋曰神農有天下七世宋均曰女媧至神農七十

二姓誰周曰伏羲次有三姓至女媧女媧五  
十姓至神農神農相承八代共五百二十年

黃帝軒轅氏亦曰地皇亦曰有熊氏亦曰帝鴻氏亦曰  
歸藏氏或言有土德之瑞故曰黃帝有軒冕之服故曰

軒轅作都于有熊故曰有熊少典娶于有嶠氏孕二十  
四月而生帝于壽邱本姓公孫以長于姬水故改姓姬  
帝生而神靈弱而能言年逾十五聰明無不徇通神農  
氏世衰諸侯相侵暴帝乃習用于戈以征不享諸侯咸  
來賓從於是修德振兵治五氣藝五種撫萬民度四方  
教熊羆貔貅猛虎與炎帝戰於阪泉之野三戰然後得  
志蚩尤爲亂獨伯天下莫與之爭衡帝乃徵師諸侯以  
中黃直爲將與戰於涿鹿之野遂禽蚩尤戮於中冀名  
其地曰絕轡之野或云榆罔之時有庶人曰蚩尤逐榆  
罔榆罔與軒轅殺蚩尤于中冀軒轅復與榆罔五戰于  
阪泉爲軒轅所滅諸侯咸尊之代神農氏爲天子是爲  
黃帝始制法度正名百物萬世不能易也爲營陣之法  
設五旗五座有不率化者從而征之凡五十二戰而天  
下服披山通道未嘗寧居東至于海登丸山及岱宗西  
至于空桐登雞頭南至于江登熊湘北逐葷粥合符釜  
山而邑于涿鹿之阿遷徙往來無常處以師兵爲營衛  
受命之日有景雲之瑞故官以雲紀師以雲命春官爲  
青雲夏官爲縉雲秋官爲白雲冬官爲黑雲中官爲黃  
雲置左右大監監于萬國萬國和而鬼神山川封禪與  
爲多焉獲寶鼎神策是歲己酉朔旦冬至得天之紀迎

通志

卷一

三皇紀一

七

日推策終而復始演八卦爲六十四卦名之曰坤乾帝受河圖見日月星辰之象始有星官之書察五運六氣乃著岐伯之間是爲內經或言內經後人所作而本於黃帝舉風后力牧泰山稽常先大鴻以治民封鉅鬼與區皆臣佐也或云黃帝得六相而天地治神明至風后明乎天道故爲當時太常察乎地利故爲稟者奢龍辨乎東方故爲土師祝融辨乎南方故爲司徒大封辨乎西方故爲司馬后土辨乎北方故爲理官又造書契調鍾律紀歷數命蒼頡爲史官制文字大撓爲帝師作甲子容成造歷隸首作數伶倫制十二律自大夏之西阮隃之陰取竹於嶰谿之谷其竅厚鈞者斷兩節閒而吹之長三寸九分以爲黃鍾之宮制十二筒聽鳳凰之鳴而別十二律其雄鳴六雌鳴亦六協黃鍾之宮是生六律六呂候氣之應以正五聲實歷數權衡度量所由生也又命榮援與伶倫鑄十二鍾以和五音仲春之月辰在乙卯日在奎始秦之命曰咸池亦曰大成始制衣服作冕旒充纊元衣黃裳析翬翟之華漬草木之英變爲五色文章而著於器服以表貴賤服牛乘馬作舟車以通道上棟下宇作宮室以居安重門擊柝以待暴客作杵臼以利用作弧矢以振威旁行海內方制萬里畫野

分州得百里之國萬區以分星次經土設井以塞爭端  
立步制畝以均不足使八家爲井井開四道而分八宅  
同井而飲存亡更守男女交姻有無相貸疾病相扶風  
俗可同生產可一性情可親井一爲鄰鄰三爲朋朋三  
爲里里五爲邑邑十爲都都十爲師師十爲州分於井  
而計於州則地著而數詳民不習僞官不懷私城郭不  
閉見利不爭風雨時若五穀豐登人無夭枉物無疵厲  
鷲鳥不妄搏猛獸不妄噬裔夷之人罔不來享有草生  
于庭佞人入則指之名曰屈軼鳳凰巢于阿閣麒麟游  
于苑囿帝二十五子爲二十五宗其四母之子得姓者  
十四人別爲十二姓姬酉祁已滕箴任荀僖媯偃依二  
人爲姬二子爲已帝娶西陵之女曰嫫祖亦曰女節生  
二子其後皆有天下一曰元囂是爲青陽降居江水爲  
帝少昊二曰昌意降居若水爲諸侯昌意娶蜀山女曰  
昌僕亦曰女極生高陽爲帝顓頊黃帝崩在橋山在位  
百年年百十歲或云在位百十年年三百歲子孫相承  
共一千五百二十年皇覽曰橋山在上  
郡今綏州也

通志

卷一

三皇紀一

九

臣謹按晉語黃帝之子二十五宗其得姓者十四人  
爲十二姓姬酉祁已滕箴任荀僖媯偃依是也二人  
爲姬二人爲已自神農至榆罔凡七世襲炎帝之號

皆神農之裔也黃帝在位百年五帝三王皆黃帝之裔也據晉語少典娶于有蟠氏生黃帝然炎帝至榆罔更八世五百年何由有同父兄弟故知國語之言不可盡信先儒本之今不遽易也臣又按方士之言曰黃帝采首山之銅鑄鼎於荆山之下鼎既成有龍垂胡髯下迎黃帝帝上騎羣臣後宮從上者七十餘人龍乃升天餘小臣不得上悉持龍髯髯拔墮黃帝之弓百姓仰望乃抱其弓與胡髯而號故後世名其地曰鼎湖弓曰烏號又曰黃帝迎日推策後率二十歲復朔且冬至凡二十推三百八十年黃帝仙登於

通志

卷一

三皇紀一

十

天又按外紀黃帝與蚩尤戰於涿鹿之野蚩尤爲大霧軍士昏迷軒轅作指南車以示四方山海大荒北經曰蚩尤伐黃帝帝命應龍攻於冀州之野應龍蓄水蚩尤請風伯雨師作大風雨黃帝下天女曰魃止兩河圖曰蚩尤兄弟八十一人竝獸身人語食沙石作兵仗刀戟大弩威振天下誅殺無度天授軒轅神符伏蚩尤蚩尤沒後亂未定軒轅畫蚩尤象以威海內管仲曰葛盧山交而出水金從之出蚩尤受之以作劍戟任昉述異記蚩尤兄弟七十二人銅頭鐵額食鐵石能作雲霧軒轅誅之於涿鹿今冀州也有蚩

尤神俗云人身牛蹄四目六手冀州人掘地得髑髏如銅鐵者卽蚩尤骨齒長二寸堅不可碎秦漢閒說蚩尤者耳鬚如劍戟頭有角與軒轅鬪以角抵人不能向今冀州有樂名蚩尤戲其民三三兩兩頭戴牛角而相觝漢造角觝戲蓋其遺制也皇覽曰蚩尤冢在東平壽張闕鄉高七尺居民常以十月食之有赤氣如匹絳而出鄉人呼爲蚩尤旗又按崔實月令曰祖者道祭也黃帝之子好遠遊死爲道路神故後人出行有祖餞之事述異記蒼頡墓在北海俗呼爲藏書室有碑文周時莫識遂藏故府逮秦時李斯始識八字云上天作命皇辟迭王漢叔孫通識十二字又云南海中有軒轅邱鸞自歌鳳自舞古云天帝樂也

臣又按伏羲有河圖之應矣而黃帝復受河圖伏羲命子襄作六書矣而黃帝復命蒼頡制文字伏羲已造律歷矣而黃帝復有律歷之作伏羲作易矣而神農黃帝復作易學者不能無疑於古帝王受命之符皆有其應有以伏羲黃帝各受河圖者也古者書契未一用字亦希故隨時而作務在應用所以周有史籀秦有李斯皆一時制字之人也乃若律歷之所更


易象之所作亦在適時所以三代之前律歷不同而易亦異

右天皇自伏羲至無懷十五世千二百六十年  
人皇自神農至榆罔八世五百年地皇黃帝一  
世百年三皇凡二十四世共千八百六十年

通志



卷一



三皇紀一

三

通志卷第一

通志卷第二

宋 右 迪 功 郎 鄭 樵 漁 仲 撰

五帝紀第二

帝少昊 帝顓頊 帝嚳 帝堯 帝舜

帝少昊青陽氏即元囂也亦謂之摯或言名摯以金德王天下亦謂之金天氏邑於窮桑帝初為己姓之祖後改為嬴作都於曲阜樂曰九淵用度量制樂器有鳳鳥之瑞故以鳥紀官為鳥師而鳥名鳳鳥氏歷正也元鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也鳴鳩氏司馬也鳴鳩氏司

通志

卷二

五帝紀二

一

空也爽鳩氏司寇也鶉鳩氏司事也五鳩鳩民者也五雉為五工正九扈為九農正官修其方而天下理帝有四子重該修熙重為本正曰句芒該為金正曰蓐收修熙相代為水正曰元冥又有金天氏之裔子曰昧為元冥師有共工氏之子為土正曰句龍有高陽氏之孫黎為高辛氏之火正曰祝融是為五官皆在高陽高辛之世少昊在位八十四年年百歲或云在位百年命歷序曰少昊傳八世五百年或云十世 葬雲陽 四百年

臣謹按昊亦作皞以能修太昊之法故曰少昊或言明象日月故曰少昊然昊者天之昭著也太昊少昊

皆明於天事者諸家記載竝存少昊惟司馬遷失紀  
謂黃帝崩高陽立且有君如少昊詎可不書況與高  
陽高辛堯舜之帝是爲五

帝顓頊高陽氏黃帝之孫昌意之子生十歲而佐少昊  
十二而冠二十卽帝位受學於綠圖靜淵以有謀疏通  
而知事養材以任地載時以象天依鬼神以制義治氣  
以教化絜誠以祭祀樂曰五莖

或云六莖

作都于衛是爲帝

邱後徙高陽故稱高陽氏尙赤薦玉以赤繒少昊之衰  
也九黎亂德民神雜糅不可方物家爲巫史無有要質

民匱于祀嘉生不降無物以享禍災薦臻莫盡其氣顓

通志

卷二

五帝紀二

二

帝受之乃命南正重司天以屬神北正黎司地以屬民  
使復舊常無相侵瀆作歷以孟春爲元是時正月朔旦  
立春五星會于營室水始泮蟄始出雞三號天曰作時  
地曰作昌人曰作樂鳥獸萬物皆以和應故顓帝聖人  
爲歷宗也命飛龍氏作樂效八風之音名曰承雲以祭  
上帝北至于幽陵南至于交趾西至于流沙東至于蟠

木

東海有山名曰度索上有大桃樹屈蟠三千里

動靜之物小大之神日月所

照莫不砥屬有子四人曰窮蟬伯鯨臯陶老童顓帝崩

葬濮陽在位七十八年年九十八歲

或云九十一歲命歷序曰顓帝傳九

世三百五十年或云

八世五百四十八年

臣謹按高陽氏以水德王天下又按容成造歷雖起於黃帝而三統歷始自伏羲然歷法以顓帝爲宗上古之時民淳俗熙爲君者惟以奉天事神爲務故其治略於人而詳於天其行事見於方冊者載在歷家及緯書爲多唐虞之後以民事爲急故其治詳於人而略於天孔子不語怪力亂神故著書斷自唐虞又按顓帝之法婦人不避男子於路者刺之四達之衢命鯁先爲樂倡鯁乃偃浸以其尾鼓其腹其音英此皆誕言也

帝嚳高辛氏亦曰偕黃帝之曾孫也黃帝生元囂是爲

通志

卷二

五帝紀二

三

少昊元囂生螭極螭極不得位而生嚳姬姓嚳問道於

柏招年十五佐高陽三十登帝位以其居於高辛故曰

高辛氏樂曰六英

或曰五英

作鄧于亳尚黑薦玉以黑繪命

咸黑爲聲歌九韶六列六英命倮作鞀鼓鍾磬吹竽管

塤箎鳳鳥天翟來舞以光帝德命重黎爲火正曰祝融

或言顓帝生稱稱生卷章卷章生重黎爲嚳火正焯耀

敦大天明地德光照四海生柔嘉材故命曰祝融共工

氏作亂帝命重黎誅之而不盡帝以庚寅日誅重黎以

其弟吳回爲重黎後復居火正爲祝融遂平共工氏帝

生而神靈自言其名博愛利物不於其身聰以知遠明

以察微順天之義知民之急仁而威惠而信修身而天下治取地之財而節用之撫萬民而利誨之歷日月而迎送之明鬼神而謹事之帝執中而徧天下日月所照風雨所至莫不服從帝有六子陳鋒氏女曰慶都孕十四月生堯於丹陵嬭訾氏女曰常儀生摯有郃氏女曰姜原生棄有娥氏女曰簡狄生契又有闕伯封商邱主辰實沈封大夏主參未知其母之爲誰也摯在位七十五年年百五歲或云六十三年年百歲又葬濮陽命歷摯傳十世摯嗣立荒淫無度諸侯廢之推堯爲天子摯在位九年非帝之限不當五運自黃帝至摯三百四十

通志

卷二

五帝紀二

四

一年少昊至摯四世二百四十一年

命歷序曰黃帝傳十世千五百二十

年或云十八代

臣謹按高辛氏以木德王天下又按共工氏在伏羲之後專任知刑以水德居木火之間霸而不王亦以水紀官周語曰共工欲壅防百川墮高堙庫以害天下皇天弗福庶民弗佑是以滅亡賈逵曰共工諸侯也炎帝之後姜姓高陽氏衰共工與高辛爭而王歸藏啓筮曰共工人面蛇身朱髮淮南子曰共工之力觸不周之山使地傾東南與高辛爭而帝遂潛于淵又曰舜時有共工振滔洪水以薄空桑文子曰共工

水害顛帝誅之荀卿曰禹伐共工據此所言皆不足信然共工氏當始於伏羲之後子孫承傳以至堯舜之世皆謂之共工氏

帝堯陶唐氏曰放勳嚳之子姓伊祁身長十尺年十五佐兄摯封唐侯二十一卽帝位或言摯禪于堯高氏云摯崩而帝放勳立堯始封于唐

今中山唐邑

後遷于晉陽及

爲天子都平陽樂曰大章帝聰明文思允恭克讓其仁如天其知如神就之如日望之如雲富而不驕貴而不舒以尹壽爲師以許由爲友內則親睦九族外則辨章百姓協和萬邦黎民於變時雍黃收純衣彤車乘白馬尙白薦玉以白繪茅茨不翦土階三尺樸桷不斲素題不枿大羹不和粢食不鑿大路無文越席不純飯土簋飲土劔夏葛衣冬鹿裘棄金玉捐文綺不視異物不寶玩器衣履不盡敝不更爲禁淫僞輕徭賦不奪民時不爭民利置諫鼓達窮民立謗木使人書之樂聞過也巡狩告成周流五嶽存鰥寡賑荒札一民飢則曰我飢之一民寒則曰我寒之一民罹辜則曰我陷之故民戴之如日月愛之如父母不賞而勸不罰而治三苗復九黎之亂堯克之于丹水之浦以服南蠻不忘重黎之舊使其後復興之是爲羲氏和氏乃命以順天之道歷象日

通志

卷二

五帝紀二

五

月星辰分爲四序以授民時義仲居岫夷理東作以殷  
春中義叔居南交理南訛以正夏至和仲居昧谷理西  
成以殷秋中和叔居朔方理朔易以正冬至四時之氣  
旣正日星之躔無爽故人民之作息鳥獸之孳乳皆可  
得而理乃正閏餘以成歲功下逮商周重黎氏世敘天  
地而別其分主是時龍門未開呂梁未發河出孟門江  
淮通流無有平原高阜故曰洪水滔天懷山襄陵堯憂  
民之憂而求治水者羣臣四嶽皆舉高陽氏之子伯鯀  
堯封鯀爲崇伯使之治水鯀乃興徒役而作九仞之城  
訖無成功堯有子十人散宜氏之女曰女皇生丹朱應

通志

卷二

五帝紀二

六

嗣堯以年老欲巽位而丹朱嚚訟不可授乃以天下授  
許由許由不受乃訪諸四嶽嶽曰有鰥民曰虞舜瞽瞍  
之子父頑母嚚弟傲舜以孝道諧其家使不至於惡堯  
曰我其試哉乃妻以二女封之有虞而爲諸侯歷試三  
年知舜之德以爲授舜則天下得其利而丹朱病授丹  
朱則天下病而丹朱得其利堯曰終不以天下之病而  
利一人卒授舜陶唐氏之世俗熙民泰有老人擊壤而  
歌於路曰吾日出而作日入而息鑿井而飲耕田而食  
帝力於我何有哉故仲尼稱之曰惟天爲大惟堯則之  
蕩蕩乎民無能名焉巍巍乎其有成功堯生以甲申卽

位以甲辰召舜以甲午召舜之年堯七十一矣舜以甲寅攝政堯九十一矣以辛巳崩是避位二十八年年在位九十八年凡百十八歲葬于穀林實濟陰百姓悲哀如喪父母三年四方莫舉樂舜畢三年之喪避丹朱於南河之南諸侯朝覲者不之丹朱而之舜獄訟者不之丹朱而之舜謳歌者不謳歌丹朱而謳歌舜舜曰天也而後之中國踐天子位焉

臣謹按陶唐氏以火德王天下又按陶唐之世越裳國獻神龜蓋千歲方三尺餘背有科斗文記開闢以來堯命錄之謂之龜歷又堯之庭有草生焉曰蓂莢

通志

卷二

五帝紀二

七

十五之前日生一葉十五之後日落一葉小餘則一葉馱而不落觀之可以知旬朔故又名歷草景星見甘露降醴泉溢朱草生神禾敷鳳巢阿閣龍見宮沼玉藕生沼中芻化爲禾鳥化爲白宮中一日而十瑞又按淮南子堯時十日竝出堯命羿仰射之中其九九鳥皆死墮其羽翼或言十日竝出焦禾稼殺草木而民無所食猋兪鑿齒九嬰大風封豨修蛇皆爲民害堯使羿誅鑿齒於疇華之野殺九嬰於凶水之上繳大風於青邱之澤上射十日下殺猋兪斷修蛇於洞庭禽封豨於桑林於是山川險夷道里遠近可得

而理也又按任昉述異記堯誅鯀於羽山化為黃熊入於羽淵今會稽人祭禹廟不用熊白黃能卽黃熊也陸居曰熊水居曰能昉按今江淮中獸名能蛇之精冬化為雉春復爲蛇今吳中不食雉毒故也臣謹按能乃來切所以古人借爲耐字其音與熊自是相遠惟文相近所以致訛實非熊也又按如淳曰誹謗之水卽橋梁交午柱頭也應邵曰誹謗木橋梁邊版也所以書政治之愆至秦去之

帝舜有虞氏曰重華亦曰大舜亦曰都君顓頊生窮蟬

窮蟬生敬康敬康生句芒句芒生螭牛螭牛生瞽瞍瞽

通志

卷二

五帝紀二

八

瞍生舜自窮蟬至舜皆微爲庶人舜重瞳龍顏大口黑色長六尺生於姚墟故姓以姚舜之母曰握登死而瞽瞍以繼室生象瞽瞍惑於繼室而眈象象復陰相父母有殺舜之心舜無所恨而事父母與弟不敢怠違年雖五十猶作嬰兒慕親堯聞其賢聘之於草茅之中與之語禮樂而知其道廣大不窮妻以二女以觀其內使九男與處以觀其外舜遷于媯汭二女從之率舜之教不敢以貴易其親戚盡婦道焉九男相與益篤舜冀州人也耕于歷山歷山之人皆讓畔漁于雷澤雷澤之人皆讓居陶於河濱河濱之器不苦窳作什器於壽邱就時

於負夏一年所居成聚二年成邑三年成都昔高陽氏  
有才子八人天下謂之八愷高辛氏有才子八人天下  
謂之八元此十六族者世濟其美不隕其名堯不能舉  
舜舉八愷使主后土以揆百事莫不時序舉八元使布  
五教于四方內平外成昔帝鴻氏有不才子天下謂之  
渾敦少昊氏有不才子天下謂之窮奇顛頊氏有不才  
子天下謂之檮杌縉雲氏有不才子天下謂之饕餮渾  
敦窮奇檮杌饕餮皆惡獸也能爲人害故天下之人目  
爲四凶堯不能去舜乃流四凶族投諸四裔以禦魑魅  
舜有大功二十四方莫不仰戴堯知舜之足授天下也

通志

卷二

五帝紀二

九

使攝行天子事舜辭不獲乃以正月朔受終于文祖文  
祖者堯之祖廟以明天下之重不敢以已授也舜用璿  
璣玉衡以齊日月五星之政類于上帝禋于六宗望于  
山川徧于羣神集五瑞五瑞者五等諸侯所執之玉也  
覲四嶽羣牧然後班瑞修巡狩之禮歲二月東巡狩至  
于岱宗柴望秩于山川覲東方諸侯協時月正日同律  
度量衡修五禮五玉三帛二生一死贄如五瑞卒乃復  
五月南巡狩八月西巡狩十一月北巡狩各於方嶽其  
禮如初歸格于祖廟用特牛禮五載一巡狩諸侯四朝  
敷奏以言明試以功車服以庸肇十有二州封其山望

濬其川瀆法有常典惟刑之恤伯鯨治水九載而功用不成三苗爲亂於江淮驩兜舉共工試以工師淫荒怠事舜因巡狩歸而言於帝請流共工于幽州以變北狄放驩兜于崇山以變南蠻遷三苗於三危以變西戎殛鯨于羽山以變東夷四罪而天下咸服舜攝位二十八年堯崩舜仰慕三年坐則見堯於牆食則覩堯於羹三年喪畢而避丹朱天下不歸丹朱而歸舜然後踐天子位卽位之明年正月元日格于文祖詢四嶽闡四門明四目達四聰四方之情無所壅蔽命十二牧所重民食敬授民時遠至邇懷蠻夷率服舜本處虞之媯汭號曰

通志

卷二

五帝紀二

十

有虞氏作都于蒲阪尙赤其社用土封丹朱于丹淵爲諸侯以奉先祀服其服禮樂如之謂之虞賓示弗臣也舜載天子之旗往朝瞽瞍彌奉子道封象於有庠象雖爲諸侯不得爲政天子使吏治其民而納其貢賦舜廣視聽求賢以自輔作五明扇立誹謗木恭己無爲彈五絃之琴歌南風之詩曰南風之薰兮可以解吾民之愠兮南風之時兮可以阜民之財兮當堯之時禹臯陶稷契伯夷夔龍垂益彭祖皆以舉用未有分職舜知任不專則功不成業不世則知不周鯨雖治水無功而禹爲其子九年之間足知利害不使易業故首命禹爲司空

平水土誅父用子而舜無疑心戮力勤王而禹無仇色  
又命棄爲后稷播百穀命契爲司徒敷五教命臯陶爲  
士明五刑命垂作工理百工命益作虞治山澤命伯夷  
作秩宗典三禮命夔典樂教胄子命龍作納言出納帝  
命舜於是總命之曰各恭厥職時亮天功三載考績三  
考黜陟幽明庶績咸熙乃封契於商賜姓子封棄於郟  
賜姓姬封禹於夏賜姓姁禹曰非予能成大費是輔舜  
嘉大費之功錫以元玉妻以姚姓之女封之土田賜姓  
嬴祚四嶽之國命以侯伯賜姓姜封於申呂卽伯夷也  
垂益夔龍之後不知所封夔效山林谿谷之音以歌以

通志

卷二

五帝紀二

七

麋輅置缶而鼓之擊石拊石象上帝石磬之音以致舞  
獸拌五絃之瑟爲十五絃命曰大章以祭上帝或曰重  
黎舉夔舜以爲樂正乃命益八絃爲二十三絃之瑟夔  
修九韶六列六英以明帝德正六律和五聲以通八風  
重黎欲益求人舜曰一夔足矣十二牧行而九州莫敢  
違惟禹之功爲大披九山通九澤決九河復舊制而定  
九州土田貢賦各效其職方五千里至於荒服天下明  
德自虞帝始其樂曰大韶故仲尼稱之曰韶盡美矣又  
盡善也君臣悅懌相和而歌曰元首明哉股肱良哉庶  
事康哉又相戒敕而歌曰元首叢脞哉股肱惰哉萬事

墮哉于時日月光華卿雲叢聚又相和而歌卿雲帝歌  
曰卿雲爛兮糾縵縵兮日月光華旦復旦兮八百稽首  
曰明明上天爛然星陳日月光華宏于一人帝乃再歌  
曰日月有常星辰有行四時順經萬姓允誠於予論樂  
配天之靈遷于賢聖莫不咸聽養乎鼓之軒乎舞之精  
華已竭褰裳去之有苗氏左洞庭右彭蠡大山在其南  
殿山在其北負固不服禹欲伐之舜曰吾德不厚而行  
武可乎乃大敷文德舞干羽于兩階七旬有苗格初舜  
娶堯二女曰娥皇女英女英生商均亦不肖舜子九人  
在位三十三載命禹攝行天子事禹推與臯陶不獲乃

通志

卷二

五帝紀二

三

以正月朔旦受命于神宗帥百官若帝之初舜生三十  
徵庸三十在位五十載陟方乃死是爲天子五十年年  
百十歲司馬遷曰舜二十以孝聞三十堯舉之五十攝  
行天子事五十八堯崩六十一代堯踐帝位三十九年  
南巡狩崩於蒼梧之野葬於江南九疑是爲零陵或言舜葬  
于紀市塵不變其肆皇甫謐曰舜以堯之二十一年甲子生三十一  
年甲午召用七十九年壬午卽眞百歲癸卯崩蓋本史記之言也  
或云舜一百五歲或云百十二歲舜豫薦禹於天十七年而  
崩三年之喪畢禹亦避舜之子諸侯歸之然後踐天子  
位丹朱商均皆有土世爲唐虞之國以奉先祀服其服  
禮樂亦如之以客禮見天子天子弗臣示不敢專也有

虞氏禘黃帝而祖顓頊郊堯而宗舜幕能帥顓頊者也

故報焉

熊安生解禮云周以黃帝堯舜之後爲三恪

臣謹按有虞氏以土德王天下又按司馬遷本孟子

之言而表裏之曰堯賜舜絺衣與琴爲築倉廩與牛

羊瞽瞍尙復欲殺之使舜上塗廩瞽瞍從下縱火焚

廩舜乃以兩笠自扞而下去得不死後瞽瞍又使舜

穿井舜穿井爲匿空旁出舜旣入深瞽瞍與象共下

土石實井舜從匿空出去瞽瞍象喜以舜爲已死象

曰本謀者象象與其父母分乃取舜妻二女與琴而

以牛羊倉廩與父母象乃止舜宮居鼓其琴舜往見

通志

卷二

五帝紀二

三

之象鄂不懌曰我思舜正鬱陶舜曰然爾其庶哉舜

復事瞽瞍愛弟彌謹又按韋昭曰三苗炎帝之後諸

侯也堯舜之時誅討有罪廢絕其世不滅其國立其

近親紹其先祀所以有苗國歷代常存屢不從化隨

巢子汲冢紀年曰三苗將亡天雨血夏有水地坼及

泉青龍生於廟日夜出晝日不出又按韓子曰瞽瞍

爲父而舜放之象爲弟而舜殺之觀此所言則六經

不得夫子所謂聖人者其難爲聖人矣韋昭三苗之

說有理哉又按任昉述異記湘水去岸三十里有相

思宮望帝臺昔舜南巡而歿葬於蒼梧娥皇女英追

之不及相與慟哭淚霑竹竹文悉爲之斑斑然又云  
會稽山下有虞舜巡狩臺臺下有望陵祠舜南巡九  
疑民思之故作是祠又云舜都郭門古宮存焉宮前  
有堯臺舜館銘記文古不復識者按皇覽曰舜冢在  
零陵營浦縣其山九谿皆相似故號九疑傳曰舜葬  
蒼梧象爲之耕山海經曰蒼梧山舜葬于陽丹朱葬  
于陰皇甫謐曰二妃葬衡山

右五帝自少昊至舜凡五世共三百八十五年

通志

卷二

五帝紀二

十四

通志卷第三上

宋 右 迪 功 郎 鄭 樵 漁 仲 撰

三王紀第三上

夏

禹夏后氏曰文命亦曰大禹

元年戊戌

姒姓顓帝生鯀鯀生

禹禹之母有莘氏女曰修己禹生於石紐長於西羌長

九尺二寸聲爲律身爲度敏給克勤其德不違其仁可

親其言可信亶亶穆穆爲綱爲紀見耕者五耨而式過

十室之邑則下爲秉德之士存焉聞善言則拜不貴尺

璧而重寸陰當堯之時洪水滔天用鯀治之九年不成

通志

卷三上

三王紀三上

一

舜攝堯之政巡狩而行見治水無狀乃殛鯀於羽山天

下皆以舜之誅爲是舜乃舉禹使續父業天下皆以舜

之舉爲公堯崩舜欲廣堯之績而求總百揆之人僉曰

伯禹作司空舜曰嗟禹汝平水土惟時懋哉禹念前日

之非度傷先人之無成一朝受命不敢迨遑勞身焦思

面目黧黑步不相過居外十三年過家聞其子呱呱而

泣門不入也菲飲食致孝乎鬼神惡衣服致美乎黼冕

卑宮室盡力乎溝洫陸行乘車水行乘舟泥行乘橇山

行乘橇身執耒耜以爲民先股無胈脰無毛手足胼胝

體幹枯蝕高高下下疏壅導滯左準繩右規矩載四時

封九山決九川障九澤豐殖九藪汨越九原宅居九隩  
合通四海品處庶類禹常言人無食則不能使也不利  
於人則不能勸也民勞而無怨苦者利之也民有鬻子  
者禹以歷山之金鑄幣而與之償命益予衆庶稻可種  
卑濕命稷予衆庶難得之食食少調有餘相給以均諸  
侯初舜分十二州禹乃復舊制爲九州行水自冀州始  
堯都冀州以天子之京邑故不言所底之山川餘八州  
皆以山川疆其所底爲萬世不易之法以州國有變遷  
而山川無變遷故也次兗州底濟河次青州底海岱次

徐州底海岱及淮次揚州底淮海次荊州底荊衡次豫

通志

卷三上

三王紀三上

二

州底荊河次梁州底華陽黑水次雍州底黑水西河州  
皆先治其山川然後定其土田賦入然後正其貢篚然  
後道一州之水使有所歸故民得安居粒食爲萬世之  
利使冀兗徐荊豫梁雍七州之水各歸于河使青州之  
水歸于濟使揚州之水歸于淮泗九州旣理然後總理  
天下凡山川皆起於極西而盡於極東水徇山而行故  
禹之導山川皆自西始導九山各有所至岍岐嶓冢至  
於荊山壺口雷首至於太岳底柱析城至於王屋太行  
常山至於碣石西傾朱圉鳥鼠至於太華熊耳外方桐  
柏至於陪尾內方至於大別岷山之陽至於衡山九江

之南至於敷淺原導九川各有所歸弱水歸于合黎黑  
水歸於南海河自積石東歸于海九河從之漢自岷冢  
南歸于江三澁從之江自岷而東由中歸于海澧水彭  
澤從之濟自滎而北由東歸于海菏汶從之淮自桐柏  
東歸于海沂泗從之渭自鳥鼠同穴東歸于河涇漆沮  
從之洛自熊耳東北歸于河澧澗伊水從之自是九州  
攸同四隩既宅九山刊旅九川滌源九澤既陂四海會  
同六府孔修庶土交正底慎財賦各循三品成賦中邦  
錫之封土賜以姓氏各戴君德無或違命然後弼成五  
服至于五千里五百里甸服郊畿之服也效其賦入甸

通志

卷三上

三王紀三上

三

而侯侯而綏綏而要而要而荒各五百里遵其法守東漸  
于海西被于流沙朔南暨聲教訖于四海天乃錫禹元  
圭爲瑞以告成功洪水漏中州乾百川順流蛇龍潛處  
民得去高險處平土者禹也故曰微禹之功吾其魚乎  
天無伏陰地無散陽水無沈氣火無災燁神無閒行民  
無淫心時無逆數物無害生天下皆宗禹爲山川鬼神  
主舜卽位三十有三載耄期倦于勤命禹總其衆攝行  
天子事禹固辭不獲乃受命十七年舜南巡狩而崩三  
年喪畢禹避舜之子於陽城天下諸侯皆去商均而朝

禹於是卽天子位號夏后氏元年作都于韓

或言安邑卽韓地

尚黑社用松牲用黑以黑爲徽號收冠元衣十寸爲尺  
封丹朱於唐商均於虞爲諸侯作樂曰大夏改正朔以  
建寅爲正月命臯陶爲夏籥九成昭其功也以五音聽  
治揭鐘鼓磬鐸鼗以待四方之士爲銘於龔簋曰導以  
道者撻鼓喻以義者鼓鐘告以事者振鐸語以憂者擊  
磬有獄訟者搖鼗嘗曰吾不恐四海之士畱於道路恐  
其畱吾門也一饋十起一沐三捉髮以勞于下出見罪  
人下車問而泣之左右曰罪人不道何痛之爲禹曰堯  
舜之人皆以堯舜之心爲心今朕爲君朕之人各以其  
心爲心是以痛之既服九州乃收天下之銅鑄九鼎以

通志

卷三上

三五紀三上

四

象九州之物初黃帝作車少昊加牛奚仲加馬禹命奚  
仲爲車正建旗旒以辨等級古有醴酪禹始命儀狄作  
酒禹飲而美乃疏儀狄遂絕旨酒曰後世必有以酒亡  
國者禹舉臯陶而薦之且授政焉臯陶卒封其後於英  
六或在許舉其子伯益任以政禹在位十年南巡狩會  
諸侯於塗山執玉帛者萬國其山今在鍾離禹濟江黃龍負舟  
舟人恐禹仰天而歎曰吾受命於天生寄也死歸也予  
何憂於龍哉視龍猶螻蛄龍俛首而逝禹致羣臣於會  
稽防風氏後至戮之防風者汪芒氏之君也漆姓守封  
嶠之山禹崩以天下授益葬于會稽之山陰在位十年

年百歲

或云在位十五年

三年喪畢益避禹之子啓居於箕山

之陰啓賢天下屬意焉益佐禹日淺天下未洽故諸侯皆去益而朝啓曰吾君帝禹之子也夏后氏禘黃帝而祖顓頊郊鯀而宗禹

臣謹按夏后氏以金德王天下又按禹平水土萬邦作又乃使大章步自東極至於西垂二億三萬三千五百里七十一歩又使豎亥步自南極盡於北垂二億三萬三千五百里七十五歩四海之內東西二萬八千里南北二萬六千里又按禹時天雨金三日亦

嘗雨稻又按述異記今吳越閒防風廟刻木作形龍

通志

卷三上

三王紀三上

五

首牛耳連眉一目禹會塗山防風後至誅之其長二丈骨專車今南中民有姓防風者卽其後也皆長大俗云祭防風秦防風古樂截竹長三尺吹之如狗吠三人被髮而舞今湖州武康防風故國也又按越傳曰禹至大越上苗山大會計爵有德封有功遂更苗山曰會稽言會計也因病死葬葦棺穿壙深七尺上無瀉泄下無邸水壇高三尺土階三等周方一畝墨子曰禹葬會稽衣裘三領桐棺三寸地里志云上有禹井禹祠相傳以下有羣鳥耘田

臣又按劉恕曰大江之南古之要服舜禹南巡崩不

返葬禹非不尊其君啓非不孝其父時享在乎廟貌  
魂氣無所不之秦漢以下崇尚墓祭違經棄禮遠事  
尸柩難以語乎理矣

帝啓

元丁未皇  
甫謚曰甲辰

其母塗山氏之女也有扈氏不服啓

伐之召六卿誓師大戰于甘之野遂滅有扈氏筮享神  
於太陵之上是爲鈞臺之享又筮于晉之墟作璿臺於  
晉水之陽在位九年崩

皇甫謚  
曰十年

子太康立

臣謹按夏爲扈商爲崇秦改鄆縣縣北二十里有故  
扈城城周四里亦有甘亭又按世本有扈氏夏同姓  
或云啓庶兄以堯舜傳賢禹獨與子故伐啓淮南子

通志

卷三上

三王紀三上

六

曰有扈氏爲義而亡又按淮南子啓之母塗山氏禹  
治洪水通轅轅山化爲熊謂塗山氏曰欲餉聞鼓聲

乃來禹跳石誤中鼓塗山氏往見禹方作熊慙而去  
至嵩高山下化爲石禹曰歸我子石破北方而啓生

帝太康

元年  
丙辰

太康尸位以逸豫滅厥德黎民咸貳乃盤

遊無度畋于有洛之表十旬弗反有窮后羿距之于河  
厥弟五人御其母嬖于洛之汭述大禹之戒而作五子  
之歌羿之祖世爲射官天子賜之弓矢使司射夏之衰  
也自鉏遷于窮石號有窮氏太康不得入國羿遂廢之  
立其弟仲康太康在位二十九年失國而崩

臣謹按許慎曰羿帝嚳射官也又按淮南子堯時十日羿射九鳥又曰羿除天下之害死爲宗布楚辭天問曰羿焉彈日鳥焉解羽博物志曰羿與鑿齒戰于疇華之野羿持弓鑿齒持矛羿殺之或曰河伯溺殺人羿射其左目風伯壞人屋室羿射中其膝舊云帝嚳堯時各有羿羿乃善射之號也臣按其字從羽從升升卽拱字拱羽爲羿與伊尹之伊相類伊從人從尹以其人能尹正天下伊與羿皆是指其人之名而制字也竊觀今之庸俗以般輪善掄才凡古屋壯麗者皆曰魯般造殊不知般爲何代之人羿必太康時人以射得名嚳嚳之時亦有善射之人世之訛者以爲羿也

仲康

元年乙酉

仲康初卽位羲和失職沈湎于酒昏迷天象

日月無紀仲康命允侯爲大司馬總六師以征之仲康之世微弱政出於羿在位十三年崩子相立

帝相

亦曰相安元年戊戌

相徙都商邱征畎夷黃夷其後于夷來

賓東夷有九種曰畎夷于夷方夷黃夷白夷赤夷元夷風夷陽夷相與有扈戰于甘澤不勝六卿請復之相曰不可德之不厚教之不修也於是處不重席食不貳味琴瑟不張鐘鼓不陳子女不飾親親長長尊賢使能菴

通志

卷三上

三王紀三上

七

年而有扈氏服然相之世政出於羿終爲羿所殺或言  
爲羿所逐失國居商邱依夏同姓諸侯斟灌斟鄩在位  
二十八年

有窮氏亦曰后羿自鉏遷于窮石因夏民以代夏政

元年兩寅國號有窮樂正后夔之子伯封貪婪無厭忿類

無期謂之封豕羿滅之夔是以不祀羿善射好田獵

不修民事而淫于原獸棄其賢臣武羅伯因熊髡尨

圍而用寒浞寒浞者伯明氏之讒子弟也羿以爲相

浞行媚于內施賂于外愚弄其民而虞羿于田樹之

詐慝羿猶不悛將歸自田家衆殺而亨之以食其子

通志

卷三上

三五紀三上

八

其子不忍食死于窮門羿篡夏自立凡八年或云二年寒

浞復殺羿而篡之元年戊戌寒國今濰州東二十三里寒亭是也浞因羿室

不改有窮之號生澆及豷澆旣長矣浞使之用師滅

斟灌及斟鄩而殺夏后相乃封澆于過封豷于戈浞

在位三十二年或云十年爲夏之遺臣靡所滅而立少康

帝少康元年少康夏后相之子也母曰后緡當寒浞用

澆滅相之時后緡方娠逃出自竇歸于有仍生少康旣

長爲仍牧正澆使其臣椒求之逃奔有虞爲虞庖正虞

君妻之以二姚而邑諸綸有田一成有衆一旅布德行

惠夏衆歸心寒浞恃其讒慝詐僞而不德于民夏之遺

臣靡自有鬲氏收二國之燼滅寒泥而立少康少康使女艾滅澆于過使季杼大呂反滅豷于戈有窮遂亡少康還舊都復禹之績祀夏配天不失舊物諸侯效職方夷來賓在位二十一年崩或云四十九年是倪羿寒泥之年歸此子杼立

臣謹按羿篡夏后相而立八年寒泥殺之因其室而生澆至澆能用師滅相相死乃生少康及少康生杼至杼能用師滅豷計太康失邦至少康復夏蓋百年之間夏之亂甚矣少康之功高矣司馬遷之紀不志其事可謂疏矣

帝杼亦曰季杼一作予省文也元年丁卯杼在位十七年崩子槐立杼能

通志 卷三上 三王紀三上 九

帥禹者也戡定寒氏之亂佐父申興故夏后氏報焉

帝槐帝王世紀作芬或作祖武亦作魁元年甲申槐之世九夷來御在位二

十六年崩子芒立

帝芒元年庚戌在位十八年或云十三年崩子泄立

帝泄或作世或作宗元年戊辰泄之世狀夷之屬六夷來王始加爵

命在位十六年崩子不降立

帝不降或作江或作元年甲申不降在位五十九年崩弟扃立

帝扃或作喬元年癸未扃在位二十一年崩子廛立

帝廛或作廣或作廛元年甲辰廛在位二十年崩不降子孔甲立

帝孔甲元年甲子孔甲好事鬼神復為淫亂夏后氏德衰諸

侯畔之在位三十一年崩子臯立

臣謹按孔甲之世天降乘龍河漢各二龍有雌雄孔甲不能食之而未獲豢龍氏陶唐氏既衰其後有劉累學擾龍于豢龍氏事孔甲能飲食之賜氏曰御龍以豕豕韋之後龍一雌死潛醢以食夏后夏后享之美既而復求之累懼遷于魯縣今汝州魯山也

帝臯元年臯在位十一年崩子發立

帝發元年發之世諸夷賓于王門獻其樂舞在位十三

年或云十一年崩子履癸立是為桀

帝桀元年夏自孔甲以來諸侯多畔桀復不道武傷其

通志卷三上三王紀三上 十

民民不堪命桀有力能申鉤索鐵伐有施有施人女以

末嬉一作妹喜末嬉嬖言無不從桀為之作象廊玉牀傾宮

瑤臺瓊室肉山脯林酒池可以運船糟隄可以望十里

一鼓而牛飲者三千人以樂之諫者以為妖言殺之伊

尹因說湯以伐夏救民湯以為賢而薦於桀桀不能用

而飲之酒羣臣醉者持不醉者不醉者持醉者相和而

歌曰江水沛兮舟楫敗兮我王廢兮盍歸乎盍歸乎亳

亦大矣伊尹退而更曰樂兮樂兮四牡驕兮六轡沃兮

覺兮較兮大命格兮去不善而從善吾何不樂兮伊尹

既醜有夏復歸于亳告湯曰桀惑末嬉上下離心皆曰

上天弗恤夏命其卒桀有暴臣于辛凌轅諸侯諛臣左師曹觸龍讒賊忠良關龍逢引黃圖以諫曰古之人君愛民節用享國之日長今君用財若無窮殺人若恐弗勝亡無日矣立而不去桀曰子又妖言矣吾之有民猶天有日日有亡乎日亡吾乃亡於是焚黃圖殺龍逢衆莫敢視桀愈自賢湯使人哭之桀召湯而囚於夏臺已而釋之桀欲肆其侈心爲有仍之會有緡叛冬十月鑿山穿陵以通河諫者曰洩天氣發地藏天子失道後必有敗桀殺之期年瞿山崩爲大澤水深九尺山覆於谷下反在上桀見籙書云亡夏者桀於是大誅豪桀大費之裔曰費昌見二日出東爛西沈問於馮夷夷曰西夏東商費昌乃歸湯湯欲伐桀伊尹請乏貢職以觀其動桀怒而起九夷之師伊尹曰未可彼尙能起九夷之師湯復脩貢職如初太史終古出其圖法執而泣之桀不聽終古奔湯湯告諸侯曰夏爲無道暴戾其民窮其父兄棄其忠良守法之臣自歸于商湯又乏貢職桀起九夷之師不至伊尹曰可矣明年相湯伐桀桀奔南巢因放之於南巢在位五十一年湯封夏後至周爲杞國舊云禹之後分封以國爲氏有夏后氏有扈氏有男氏斟尋氏彤城氏褒氏費氏杞氏澘氏辛氏冥氏斟氏戈氏

通志

卷三上

三五紀三上

十

臣謹按桀之時至德滅而不揚帝道揜而不興發號  
逆四時春秋縮其和天地除其德樹社槁而崩裂容  
臺振而掩覆犬羣嗥而入淵豕銜琴而席隳美人挈  
首墨面而不容曼聲吞炭內閉而不歌喪不盡其哀  
臘不聽其樂西老折勝黃神嘯吟飛鳥鍛翼走獸廢  
腳山無峻榦澤無注水田無立禾路無莎蘋金積折  
廉壁龔無理百川沸伊洛竭泰山走山石泣宮中女  
子化爲龍俄復爲婦人甚麗而食人桀命爲蛟妾告  
吉凶鸛鳴於國十日夕不止天雨血雨水冰六月霜  
降桀爲夜宮於深谷之中男女雜處三旬不出聽政

通志

卷三上

三王紀三上

三

一夕大風揚沙填宮合之然桀時雖多災異亦安得  
有如此所謂兩日鬪五星錯行鬼哭於國柱矢流地  
出黃霧堯山崩庚山亡地震雷霆殺人之異容有之  
右夏之世起禹元年戊戌終桀五十一年己酉  
十七君十五世通后羿寒浞四百三十二年

商

契古作

帝嚳之子母曰簡狄有娥氏之女也簡狄因浴

而行有三人焉見元鳥墮卵簡狄取而吞之乃孕生契

契佐禹治水有功舜命之曰百姓不親五品不遜汝作

司徒敬敷五教五教在寬封於商

今上洛也賜姓子

禮緯曰以元鳥

生子契與益稷臯陶見用於堯舜禹之時功業顯著卒  
故也 契與益稷臯陶見用於堯舜禹之時功業顯著卒  
子昭明立 卒子相土立 相土居商邱宋地也 故傳曰闕  
伯居商邱相土因之 卒子昌若立 卒子曹圍立 卒子冥  
立 冥爲夏司空 主水勤其官事 死於水中 商人郊之子  
振立 卒子微立 卒子報丁立 卒子報乙立 卒子報丙立  
卒子主壬立 卒子主癸立 卒子天乙立 是爲成湯

臣謹按商人及周人繼繼者傳父子及者傳兄弟報  
丁報乙報丙與主壬主癸皆弟兄之名疑前史指爲  
父子過矣

湯亦曰成湯亦曰履亦曰天乙以其用武得天下故號

通志

卷三上

三王紀三上

三

曰武王爲商家創業之祖故廟曰烈祖契之封商本上  
洛後世遷于亳故京兆杜縣亳亭是也司馬遷云禹興  
西羌湯起亳俱在西也及湯有天下始居于商邱復命  
以亳梁之穀熟是也本帝嚳之都故曰湯始居亳從先  
王居自契至成湯凡八遷亳都有澗水在焉故亦謂之  
殷後世遷于囂遷于相遷于耿遷于朝歌而殷商之名  
未始偏廢以開國受命之祖所以命也湯爲夏方伯得  
專征諸侯與葛爲鄰葛伯放而不祀湯使問之咎以犧  
牲案盛不給湯使遺之牛羊復使亳衆往爲之耕其不  
祀自若有餉者葛伯殺之而奪其食湯始征之故曰湯

征自葛始東征西夷怨南征北狄怨皆曰奚獨後予后  
來其蘇民之戴商久矣夷狄且懷之況中國乎伊尹處  
士也名摯耕於有莘之野湯使人以幣聘之五反然後  
往見湯言素王及九主之事或言伊尹爲有莘氏之媵  
臣負鼎俎以滋味說湯致於王道湯舉伊尹任以國政  
伊尹乃進君國子民之人皆在王官湯以伊尹爲賢而  
薦於桀伊尹去湯適夏既醜有夏復歸于亳入自北門  
遇汝鳩汝方作汝鳩汝方之篇以言其志也湯出見網  
於野者張其四面而祝之曰自天下四方皆入吾網湯  
曰嘻盡之矣去其三面而更其祝曰欲左左欲右右欲  
通志 卷三上 三王紀三上 五

高高欲下下不用命者乃入吾網漢南諸侯聞之曰湯  
德至矣及禽獸一時歸商者三十六國或言四十國有  
白狼銜鉤及黃金黑玉之瑞夏末昆吾氏伯而爲亂湯  
爲景亳之會以徵兵於諸侯湯親秉鉞伐韋顧及昆吾  
韋顧昆吾之與國也復黨於桀昔高辛火正祝融氏曰黎其後有八姓昆吾蘇  
顧温已姓也酸夷秦龍董姓也彭祖丞韋諸稽彭姓也  
舟人秃姓也鄔鄆路偃陽姁姓也鄔呂曹姓也又有莘  
姓斟姓惟斟無後或云帝嚳之祝融曰吳回生陸終陸  
終有子六人坼剖而生長昆吾次參胡次彭祖次會人  
次安斟湯既克三國伊尹遂相湯伐桀湯以費昌爲御  
與桀戰于鳴條之野夏師敗績桀走保三腹今定陶也遂伐  
三腹俘厥寶玉而放桀焉伊尹報于諸侯諸侯大會湯

再拜而從諸侯之位曰天命無常惟歸有道三辭諸侯莫敢當乃踐天子位湯歸自夏至于大坰惟有慙德曰予恐來世以予爲口實蓋以臣伐君以干戈取天下自湯始所以慙也故仲虺作誥以釋之湯爲天子反桀之事遂其賢良以寬治民除其邪虐徇民所欲順天革命改正朔以建丑爲正月或言湯作歷不以正月朔旦爲節更用十一月冬至爲元首至周從之服色尙白朝會以晝社用柏或云社用石葬植松牲用白以白爲徽號朝燕服舛冠而縞衣十二寸爲尺初置二相以伊尹仲虺爲之湯謂伊尹曰每勤諸侯遠獻方物吾欲因其地之所有易得不貴乃命伊尹爲獻令初作圓取禽獸以奉宗廟簡士卒習射御以戒不虞海外肅慎北發渠椽氏羌來服民無食者以莊山之金鑄幣而賑之自伐桀之後七年大旱洛壙川竭煎沙爛石太史氏曰當以人禱湯曰請雨爲民也若以人禱吾自當之乃齊戒剪髮斷爪素車白馬嬰以白茅身爲犧牲禱於桑林之社持三足鼎祝諸山川曰勿以予一人之不敏俾上帝鬼神傷民之命仍以六事自責曰政不節與民失職與宮室崇與婦謁盛與苞苴行與讒夫昌與言未訖雨大作方數千里命伊尹作樂曰大濩修九韶六列聞宮聲使人

溫良而寬大聞商聲使人方廉而好義聞角聲使人惻  
隱而仁愛聞徵聲使人樂養而好施聞羽聲使人恭謹  
而好禮湯令未命之士不得朱軒及飛輪不得乘飾車  
駟馬衣文繡命然後得以旌有德湯二十七征而天下

服在位十二年

元年庚戌

年百歲葬濟陰有莘氏生太丁外

丙仲壬太丁爲太子早卒而立其弟外丙商人禘舜而

祖契郊冥而宗湯上甲

皇甫謐曰微字上甲

能帥契者故報焉

臣謹按劉向別錄曰九主者有法君專君授君勞君

等君寄君破君國君三歲社君凡九品圖其形象又

按湯以水德王天下又按皇覽曰湯冢在濟陰亳縣

通志

卷三上

三王紀三上

五

北東郭外三里冢四方各十步高七尺漢哀帝建

平元年大司空御史長卿按行水災至湯冢劉向曰

湯無葬處皇甫謐曰湯卽諸侯位十七年爲天子十

三年百歲而崩又按湯聞伊尹賢使人請於有莘氏

不可伊尹亦欲歸湯湯娶於有莘氏乃以伊尹爲媵

送女湯得伊尹祓之於廟照之以燭釁以犧豕明日

設朝而見之伊尹請湯以至味湯曰可得而爲之乎

對曰君之國小不足以具之爲天子然後可因說湯

以伐夏救民

帝外丙

元年癸亥

外丙在位二年崩立其弟仲壬

帝仲壬仲一作中元年乙丑仲壬在位四年崩伊尹立太丁之子太甲實成湯之適長孫也

帝太甲亦曰祖申元年己巳太甲嗣位伊尹爲之作伊訓肆命徂

后明言烈祖成湯之德以訓于王太甲既立不明伊尹放諸桐而攝政當國以朝諸侯太甲居桐宮三年悔過遷善十有二月朔伊尹以冕服奉鬯王歸于亳迺作太甲三篇而申訓之伊尹既復政告老將歸又作咸有一德太甲在位三十三年廟曰太宗商家祖有功而宗有德故後世以祖宗稱之太甲崩子沃丁立

臣謹按伊訓成湯既沒太甲元年孔傳曰太丁未立

通志

卷三上

三王紀三上

七

而卒及湯沒而太甲立孟軻司馬遷云湯崩外丙仲壬皆卽位乃及太甲與書不同劉歆皇甫謐皆從之此雖畔經亦無害若乃汲冢紀年曰商仲壬卽位居亳崩其卿士伊尹放太甲于桐乃自立也伊尹卽位放太甲七年太甲潛出自桐殺伊尹乃立其子伊陟伊奮命復其父之田宅而中分之此害經之甚者也

帝沃丁

元年壬寅

沃丁八年伊尹卒伊尹於太甲之時告老

而歸于其邑至是沃丁乃葬之于亳在湯冢之西從先王也後世尊之曰先正保衡咎單相沃丁遂訓伊尹事而作沃丁之篇沃丁在位二十九年崩弟太庚立

臣謹按孔氏傳曰沃丁以三公禮葬伊尹皇甫謐曰沃丁八年伊尹卒年百餘歲大霧三日沃丁葬之以天子禮祀以太牢親臨喪以報大德焉又按皇覽曰伊尹冢在濟陰己氏平利鄉近於亳

帝太庚元年太庚在位二十五年崩子小甲立徐廣曰世表云

小甲太

帝小甲元年小甲在位三十六年帝王本紀云崩弟雍

已立

帝雍已元年雍已之時商道始衰侯諸或不在位十

三年崩弟太戊立

通志 卷三上 三王紀三上

六

帝太戊元年太戊命伊尹之子陟為相亳有祥桑與穀

合生于朝一暮大拱或云七日大拱太戊患焉伊陟曰

妖不勝德君之政無乃有闕與太戊占之曰野木生於

朝國必亡於是修先王之政明養老之禮早朝晏退問

疾弔喪三日而祥桑枯死三年遠方之人重譯而至者

十六國是時太戊相伊陟巫咸而用臣扈伊陟贊于巫

咸或言巫咸治王家有成作咸又四篇太戊復贊伊陟

于廟言弗臣也作伊陟之篇伊陟辭焉作原命之篇臣

主皆賢商道復興在位七十五年崩廟曰中宗子仲丁

立

帝仲丁元年庚子仲丁自亳遷于囂囂亦作敷今河南敖倉是也藍夷爲

寇仲丁征之在位十一年崩弟外壬立

帝外壬元年辛亥外壬在位十五年崩弟河亶甲立

帝河亶甲元年兩寅亶甲遷于相今鄆都也商復衰在位九年崩

子祖乙立

帝祖乙元年乙亥祖乙遷于耿河中龍門縣南十里故耿城是也爲水所圯

遷于邢今邢州治也或云遷于奄巫賢任職商道復興在位

十九年崩子祖辛立

帝祖辛元年甲午祖辛在位十六年崩弟沃甲立

帝沃甲一作開甲元年庚戌沃甲在位二十年崩祖辛之子祖丁

通志卷三上三王紀三上五

立

帝祖丁元年庚午祖丁在位三十三年崩沃甲之子南庚立

帝南庚元年壬寅南庚在位二十九年崩祖丁之子陽甲立

帝陽甲元年辛未陽甲之世商道衰微自仲丁以來廢適而

立諸弟弟子爭立比九世亂諸侯莫朝在位七年崩帝王

本紀云十七年弟盤庚立

帝盤庚元年戊寅盤庚之前作都在河北水泉汙溺蕩析民

居盤庚將涉河以民遷商自成湯以來凡五遷都邑臣

民重遷而相咨怨盤庚爲是諭諸侯大臣言其先祖佐

我高后成湯法則可修之事以曉衆志乃渡河治亳修

湯之德行湯之政諸侯來朝在位二十八年崩弟小辛立

臣謹按皇甫謐曰孟子稱湯居亳與葛爲鄰亳卽梁國穀熟縣也實湯之所都是爲南亳又湯有景亳之命梁國蒙縣北有亳城實湯所受命朝諸侯處是爲北亳盤庚所治亳在河南偃師是爲西亳三地皆名亳立政所謂三亳也然亳之名本在西商人初作邑于商實上洛也後遷于亳故京兆杜縣有亳亭是也三亳之名皆自此亳始

帝小辛

元年  
丙午

小辛不能紹盤庚之業商家微矣百姓思

通志

卷三上

三王紀三上

十

盤庚之治作盤庚三篇在位二十一年崩弟小乙立

帝小乙

元年  
丁卯

小乙在位二十年崩子武丁立

帝武丁

元年  
戊午

武丁爲太子時學于甘盤遜于荒野盡知

民之疾苦能聳其德至于神明居憂亮陰三年不言政事決於冢宰旣免喪猶不言羣臣咸諫曰天子惟君萬邦百官承式王言惟作命不言臣下罔攸稟命王作書以誥曰以予正于四方予恐德弗類茲故不言恭默思

道夢帝賚予良弼其代予言乃審所夢之象使圖其形以求於天下而得說焉說築室於傳巖之野惟肖厥象武丁見之與語而知其賢爰立作相而命之氏蓋因所

居也故曰傳說惟說總百官朝夕納誨于王又與同僚  
協心佐治以成商家中興之業武丁開先祖之府取其  
明法以爲君臣上下之節武丁祀成湯之明日有飛雉  
升鼎耳而雉武丁患其不祥其賢臣祖已作訓于王言  
天之所監在民王能愛民無非天祚武丁又責躬思道  
三年編髮重譯來朝者六國自是服章多用翟羽孔子  
曰吾於高宗彤日見修德而報之疾也苟由其道致其  
仁則遠方歸德焉鬼方恃固而擾諸夏武丁伐之三年  
乃克自是內外無患在位五十九年崩祖已嘉武丁之  
祥雉爲立廟爲高宗子祖庚立

通志

卷三上

三王紀三上

五

臣謹按書大傳曰湯之後武丁之前王道不振桑穀  
俱生于朝七日而大拱武丁問諸祖已祖已曰桑穀  
野草而生于朝朝必亡武丁懼側身憂行思先王之  
道興滅國繼絕世舉逸民明養老之道三年之後重  
譯而朝者六國又按劉向日高宗承商敝而起盡諒  
陰之哀天下應之旣獲安定而怠於政乃有桑穀之  
異又劉向著說苑以太戊武丁時俱有桑穀異又按  
呂氏春秋湯時穀生于廷比旦而大拱

臣謹按孔安國曰傅氏之巖在虞虢之間通道所經  
有澗水壞道常使胥靡刑人築其道說賢而代胥靡

之築以售食焉又按皇甫謐曰高宗夢天賜賢人胥靡之衣裳之而來曰我徒也姓傅名說得我者豈徒也哉武丁寤而推之曰傅者相也說者歡說也天下當有相我而說民者哉明日審夢以示百官皆非也乃使百工寫其形象求諸天下果見築者胥靡衣褐帶索執役于虞虢之間傅巖之野名說以其得之傅巖謂之傅說然謚旣曰姓傅名說又曰得之傅巖謂之傅說何也又按墨子曰傅說居北海之州園土之上衣褐帶索售築於傅巖之城臣按築者築室也依巖築室其隱者與懷才抱道應時而起非役徒也以

通志

卷三上

三王紀三上

五

士君子之身何自苦而衣胥靡之衣爲刑人之事乎

帝祖庚

元年

祖庚在位七年崩弟辛甲立

帝辛甲

亦曰祖甲  
元年甲午

無逸言祖甲者太甲也在位十六年

崩子廩辛立

臣謹按鄭康成曰祖甲之兄祖庚賢武丁欲廢兄立弟祖甲以爲不義逃於民間周語曰帝甲而亂七世而隕

帝廩辛

亦曰馮辛  
元年庚戌

廩辛在位六年崩弟庚丁立

帝庚丁

元年  
兩辰庚丁在位六年

帝王本紀  
日十一年崩子武乙立

帝武乙

元年  
壬戌

武乙復去亳都河北中國微弱東夷盛彊

分遷淮岱漸居中土武乙無道爲偶人謂之天神令人  
爲行與之博天神不勝僂辱之爲革囊盛血仰而射之  
命曰射天獵於河渭之間震死在位四年竹書紀年曰  
武乙三十五年

年周子太丁立

帝太丁元年太丁在位三年紀年曰  
十一年崩子乙立

帝乙亦曰辛乙  
元年巳巳乙之子三人長曰微子啓次曰仲衍季

曰紂啓母賤而立紂焉適故也或言三人同母母本妾  
也以爲后生紂紂尙幼乙及后謂啓賢欲以爲太子太  
史據法而爭之曰廢適立庶不可乙在位三十七年商  
家日微崩少子紂立

通志 卷三上 三王紀三上

三

紂亦曰辛亦曰受亦  
曰受德元年兩年紂資辨捷疾見聞甚敏材力過人

手格猛獸知足以拒諫言足以飾非矜人臣以能高天  
下以聲以爲皆出己之下始爲象箸箕子歎曰彼爲象  
箸必爲玉杯玉杯象箸必不盛土簋而羹菽藿必不衣  
襠褐而舍於茅茨之下將錦衣九重高臺廣榭稱此以  
求之天下不足其求矣致遠方珍怪之物侈輿馬宮室  
之漸自此始箕子者紂之諸父也或言紂之庶兄名胥  
餘紂伐有蘇氏有蘇氏以妲己女紂紂惑之言無不聽  
所好者貴所惡者誅使師延一作涓作朝歌北鄙之音北  
里之舞靡靡之樂造鹿臺而爲瓊室玉門臺三里高千

尺七年乃成

其臺今在朝歌城中

厚賦斂以實鹿臺之錢而盈鉅

橋之粟益收狗馬奇玩充初宮室以人食獸廣沙邱苑

臺多取鳥獸之異者寘其中大聚樂戲於沙邱以酒為

池以糟為邱縣肉為林使男女裸相逐其閒大宮百里

宮中九市與崇侯費中戲於離宮以百二十日為一夜

謂之長夜飲車行酒騎行彘以繩羈人頭引就酒池醉

而溺死紂醉而忘其日辰甲子問左右皆不知問箕子

箕子曰一國失日天下其危乎國人不知吾獨知之吾

其危乎亦以醉不知百姓怨望諸侯有畔者妲己以為

威不立耳乃說紂重刑辟初為鬻斗而然之使人舉鬻

通志

卷三上

三王紀三上

通

更用銅柱而膏之焚於其下俾囚辟緣柱以資妲己之

笑名曰炮烙之刑紂以西伯昌九侯鄂侯為三公九侯

亦謂鬼侯

今鄴縣有九侯城是也鄂徐廣謂一名邢野王縣有邢城今懷州治然晉地亦有名鄂者

九侯之女美納之於紂其女賢而不淫紂惡而殺之醢

九侯鄂侯爭之脯鄂侯又剖孕婦而視其胎斬朝涉之

脛而視其髓西伯聞而竊歎崇侯虎以告且曰昌仁而

有謀太子發勇而不疑中子且恭儉而知時冠雖弊禮

加頭履雖鮮位在足彼將易置焉請及其未成形圖之

紂於是囚西伯於羑里

今河內湯陰

周之臣散宜生南宮适

閔天患之而問於呂尚三子舊學於尚尚知其賢相與

見西伯羨里乃求有莘之美女驪戎之文馬有熊之九  
駟西海濱之白狐金陵怪獸江淮大貝因嬖臣費中而  
獻之散宜生趨而進曰西藩之臣昌命其行人敢效其  
寶以免其辜紂大說曰一物足以釋其辜況多乎西伯  
歸而獻洛西之地赤壤之田方千里請除炮烙之刑紂  
許之仍賜弓矢斧鉞得專征典治南國江漢汝潁之諸  
侯率循西伯之令於是陽爲玉門築靈臺列侍女撞鐘  
鼓爲樂紂聞之曰西伯改行吾無憂矣西伯陰修德行  
善諸侯多畔紂而歸周紂用費中爲政費中善諛且嗜  
利又用蜚廉惡來革蜚廉善走惡來革者蜚廉之子也  
有力手裂虎兕善讒讒商容賢者棄而不用自此諸侯  
日益疏惟黎國爲近於郊畿之間附紂周人伐黎商之  
賢臣祖伊恐奔告于紂紂曰我生不有命在天於是作  
西伯戡黎西伯九年卒太子發立是爲武王紂之淫虐  
滋甚微子數諫不從欲死與亡未能決問於太師疵少  
師彊對曰死而能安社稷利國家不恨爲死死不能安  
社稷利國家不如亡箕子又諫不聽人曰可以去矣對  
曰知不用而言之不智也殺身以彰君之惡不忠也爲  
人臣而自說於民吾不忍爲也乃被髮佯狂爲奴隸鼓  
琴以見志傳之者爲箕子操紂囚之王子比干紂之諸

父也曰爲大臣者不諫非忠也不死非勇也諫三日不去紂曰吾聞聖人之心有七竅乃剖比干之心而視之或言劓剔孕婦卽比干之妻也微子曰父子有骨肉之恩而臣主以義屬父有過子三諫不聽則隨而號之君有過臣三諫不聽義可以去矣太師少師抱其祭器樂器奔周內史向摯載其圖法亦奔周武王問太公曰仁者賢者亡矣商可伐乎對曰先謀後事者昌先事後謀者亡夏條可結冬冰可折時難得而易失初武王使人候商報曰讒勝良王曰未也又往報曰賢者出走王曰尙未也又往報曰民不敢誹怨矣王曰嘻遠告太公對曰刑勝故也其亂至矣往年武王東伐至孟津觀兵於商郊而還惟十有三年春大會於孟津二月甲子至商郊與紂戰於牧野紂兵敗乃走入宣室登鹿臺衣其寶玉就焚武王持大白之旗以麾諸侯諸侯畢拜武王揖之諸侯從入商國至紂死所王自射之三發而後下車以輕劍擊之以黃鉞斬紂之首而揭之大白之旗親射惡來之口紂之嬖寵如妲己者二人皆自殺王又射三發擊以劍斬以元鉞而揭其首於小白之旗武王命周公訪商之遺老而知民之所欲乃修盤庚之政親商如周視仇如戚裂鼓折枹弛弓絕楛去舍宿露解劍帶芴

商人忘亡紂在位三十三年身滅國亡太史公云成湯之後分封以國爲姓有殷氏來氏宋氏空桐氏稚氏北殷氏日夷氏然日夷公子魚之字也安得爲國空桐氏稚氏竝非國號

臣謹按高氏云周武王爲天子始貶帝號稱王今考左傳云宋祖帝乙鄭祖厲王司馬遷本紀夏商皆稱帝周始稱王又按紂在位以來夷羊在牧梓化爲松有燕口爪俱旬天雨肉雨血于亳大旱大水河竭山鳴兩日見天火焚宮宮中鬼夜哭女化爲男龜生毛兔生角紂嘗六月獵於西土發民逐獸諫者曰長育

通志

卷三上

三王紀三上

五

之時不可逆天道絕地德君踐一日之苗民失百日之食紂殺之後數月大風飄牛馬發屋拔木飛揚數十里有雀生鷓占曰以小生大國家王而名昌紂聞是占而益怙又按武王平商有二虜問之曰是國有妖乎一虜曰晝見星天雨血雨灰雨石大如甕六月雨雪一虜曰商有大妖此不與也子不聽父弟不從兄信者爲欺欺者爲忠婦人爲政君子在野小人在位急令暴取以人餒虎田獵畢弋走狗試馬不避風雨好治池臺宮室百里之宮七十三所坐起以金鼓無長幼貴賤無禮義忠信無斗尺權衡此妖之大者

也武王賈其言再拜

右商之世起湯元年庚戌終紂三十三年戊寅  
三十君十七世六百二十九年商歷日起丙戌  
終癸亥四百五  
十八年汲冢紀年曰二  
十九王四百九十六年

通志

卷三上

三王紀三上

三



通志卷第三上

通志卷第三下

宋 右 迪 功 郎 鄭 樵 漁 仲 撰

三王紀第三下

周

棄曰后稷帝嚳之子也其母有邠氏女曰姜原姜原為  
帝嚳元妃因出野見巨人跡心忻然說欲踐之踐之而  
身動如孕者居期而生子以為不祥棄之於隘巷牛羊  
過者皆避不踐或腓字之徙置之平林會伐林木者收  
而生之又遷而寘於渠中水上飛鳥以其翼覆薦之姜  
原以為神遂取養長之初欲棄之故名曰棄棄為兒時

通志

卷三下

三王紀三下

一

忙如巨人之志其游戲好蓺麻菽麻菽美及為成人遂  
好耕農相地之宜穀者稼穡焉民皆效之堯聞而舉為  
農師民得其利舜命之曰棄黎民阻飢汝后稷播時百  
穀封於邰今武功縣號曰后稷別為姬姓后稷之興在  
陶唐虞夏之際皆有令德與契益伯夷佐禹平水土各  
有功稷勤於百穀而山死子不窋襲位不窋末年夏后  
氏政衰去稷不務不窋失其官奔戎狄之間卒子鞠立

鞠亦曰

卒子公劉立公劉雖在戎狄之間復修后稷之

業務耕種行地宜遷邑于豳

今邠州三水西南三十里有古豳城是也

乃

自漆沮渡渭取材用行者有資居者有積百姓懷之多

徒歸焉周道自此而興詩人樂其德而歌之卒子慶節

立或言慶節國于幽卒子皇僕立卒子差弗立卒子毀

隃立卒子公非立公非亦曰辟方卒子高圍立高圍能率后稷

者也故周人報焉卒子亞圍立亞圍亦曰雲都卒子公叔祖類

立公叔祖類亦曰太公叔類亦曰組紺諸豎卒子古公亶父立古公當殷武

乙之時王綱不振能復修后稷公劉之業積德行義國

人戴之薰粥來攻古公事之以皮幣犬馬珠玉菽粟貨

財皆不得免焉復欲其土地與民古公曰與之耆老曰

君不為社稷乎曰社稷所以為民也不可以所為亡民

也耆老曰君不為宗廟乎曰宗廟吾私也不可以私害

通志 卷三下 三王紀三下 二

民也夫有民立君將以利之與人之兄居而殺其弟與

人之父居而殺其子以其所養害其所養吾不忍也民

之在我與其在其彼何異二三子何患乎無君杖策而去

率其私屬去幽渡漆沮逾梁山邑于岐山之下今鳳翔府岐山

是始改國號曰周或言后稷始封于邠邠即號曰周幽人曰仁人之君不

可失也舉國扶老攜幼從之者二千乘一止而成三千

戶之邑鄰國聞其仁而多歸之古公乃貶戎狄之俗營

築城郭室屋而居作五官有司曰司徒司馬司空司士

司寇民歌樂之頌其德古公娶有邠氏女曰太姜美而

賢生太伯仲雍季歷或言太姜生少子季歷季歷娶摯

國之女曰太任亦賢生昌有聖瑞昌在母不憂在傅不勤處師不煩事父不怒友于二號二號者昌之二弟號仲號叔古公

曰我世當有興者其在昌乎太伯仲雍知古公欲立季歷以傳昌乃二人亡如荆蠻文身斷髮太伯自號句吳

荆蠻義而歸者千餘家古公卒或言百二十歲武王王天下追

號古公為太王太王能率稷者也故周人報焉季歷日

公篤於行義諸侯順之商益衰公季以功多受圭瓚拒

鬯之賜九命作伯號西伯得專征乃伐西落鬼戎俘其

主以歸公季卒年百歲子昌立武王王天下追號公季為

王季

通志 卷三下 三王紀三五

三

臣謹按王肅曰太伯見王季生文王知天命之有在去而適吳太王沒而不反或言古公將卒謂季歷曰我死汝即推兩兄彼即辭汝有義而安矣古公卒季歷之吳召二兄相從而歸羣臣欲立之太伯仲雍以先君之命不可復如荆蠻

文王昌襲公季為西伯及武王王天下追諡文王文王遵后稷公劉之業則古公公季之法篤仁優老慈少禮賢日中不暇食以待士士以此多歸之伯夷叔齊兄弟辭國而歸文王曰吾聞西伯善養老盍歸乎來太顛闔天散宜生南宮适鬻子辛甲大夫之徒皆歸之鬻子名

熊時年九十西伯曰子老矣鬻子曰捕虎逐麋臣已老矣坐而籌策臣尙少也封於楚辛甲故商之臣事紂蓋七十五諫不聽而去至周召公與語賢之以告文王文王自迎之封於長子文王之爲政也詢于八虞八虞者周之八士皆爲虞官咨子二虢以爲卿士度於閔天謀於南宮諏於蔡原訪於辛甲重以周召畢榮是以能治紂用崇侯虎之讒囚文王子美里於是究明易道或言始作彖象文王被囚七年諸侯皆從之囚紂懼而歸之曰諸西伯者崇侯虎也文王之行信於諸侯諸侯皆來決平虞芮之君爭田既久俱如周質焉入其境耕者讓

通志

卷三下

三王紀三下

四

畔行者讓路入其邑男女異路班白不提負入其朝士讓爲大夫大夫讓爲卿虞芮之君皆有慙色曰吾所爭周人所恥吾曹小人不可以履君子之庭俱讓而去以其田爲閒田天下聞之一時歸周者三十餘國或言四十餘國

諸侯皆曰西伯蓋受命之君文王自是更稱元年是時

商道不宏諸侯多事文王文王一年斷虞芮之質二年

伐邾三年伐密須四年伐犬夷五年伐黎

黎亦謂之者

六年

伐崇七年而崩

史記亦以斷虞芮之訟爲受命之年明年伐犬戎明年伐密須明年敗者國明

年伐邾明年伐崇侯虎明年西伯崩雖所伐有差而同爲七年崩然書明言九年大統未集安得爲七年崩也

自虞芮之訟決諸侯皆取質於西伯西作爲是東征西伐以討不平伯者之事也安得爲受命乎

初文

王伐邗問太公曰孰可伐太公曰密須可管叔曰其君  
疆明伐之不可太公曰先王伐逆不伐順伐險不伐易  
遂自阮徂共而及密須密須之人自縛其君而歸文王  
文王伐崇宣言曰崇侯虎蔑侮父兄不敬長老聽訟不  
矜分財不均民力盡不得衣食予將征之乃伐崇令無  
殺人無壞室無塞井無伐木無掠六畜不如令者不赦  
三旬而崇不降退修教而復伐之因壘而降文王行於  
野見枯骨命吏瘞之吏曰此無主矣文王曰有天下者  
天下之主有一國者一國之主吾卽其主也以棺衾而  
葬之天下聞之曰西伯之澤及枯骨況於人乎或言文  
通志

卷三下

三王紀三下

五

王爲沼而得枯骨葬之文王問太公曰爲天下若何對  
曰王者之國富民伯者之國富士僅存之國富大夫無  
道之國富倉府是謂上溢而下漏文王曰善遂發倉府  
賑窮獨文王之業旣光大乃遷于豐

豐今在永興鄆縣東南有豐水焉

去岐山三百餘里分岐邗周召之地爲周公旦召公奭  
之采邑天下三分有其二猶率殷之叛國以事紂是時  
五星聚於房赤雀銜書止于屋又有黃龍元龜白魚赤  
雀負圖銜書之應文王九年實紂之三十年也文王寢  
疾五日謂太子發曰見善而弗怠時至而勿疑去非而  
勿憚三者道之所止也太子再拜受之文王在位五十

年崩 呂氏春秋曰四十一年 九十七葬于畢 今長安縣西畢陌是也

也 文王娶有莘氏之女曰大妣號文母文王治外文母

治內文王之業賴文母之助為多焉大妣十子長伯邑

考次武王發次管叔鮮次周公旦次蔡叔度次曹叔振

鐸次郟叔武次霍叔處次康叔封季曰聃季載 皇甫謐曰文王

生伯邑考次武王次管叔次蔡叔次郟叔次霍叔 次周公次曹叔次康叔次聃季名同國同而次異

尤賢左右文王故文王舍伯邑考而立武王也又有膝

毛郟雍畢原豐郟八國皆文王子也文王身長十尺十

二而冠十三而生伯邑考焉

臣謹按諸侯即位而再改元者或有焉史記秦惠王

通志 卷三下 三王紀三下 六

十四年更為元年汲冢紀年魏惠成王三十六年改

元稱一年何必受命而後改元也又按秦誓之序曰

十有一年武王伐商其書曰十有三年春大會于孟

津洪範亦曰十有三祀王訪于箕子則知武王伐商

在十三年由秦誓序之訛以三為一致後之說者紛

紛也又按文王即位之八年六月寢疾五日而地震

東西南北不出郊圻有司曰地震為人主也羣臣皆

恐欲斫其城以移之文王曰天之見妖以罰有罪我

若有罪若何逃罰率德改行其可免乎於是謹其禮

秩皮革以交諸侯飭其辭令幣帛以禮俊士頒其爵

級田疇以賞有功未幾疾愈又按文王囚於羑里隄憤而歌曰商道溷溷寢濁煩兮朱紫相合不別分兮迷亂聲色信讒言兮炎炎之虐使我愆兮幽之牢寘由其言兮遇我四國憂勤勤兮又按文王與呂尙語而大說曰吾先君太公曰當有聖人適周周以興無乃子邪吾太公望子久矣故號太公望然此臆說也名號之義不如是且周之先公無號太公者又何望焉又按文王以伯邑考質於商爲紂御紂曰吾聞聖人不食其子乃烹伯邑考以羹遺文王文王得而食之紂曰孰謂昌爲聖人此皆誕語也

通志

卷三下

三王紀三下

七

武王卽位太公望爲師周公旦爲輔召公畢公之徒爲左右修文王之業文王之十一年

或言九年

東觀兵至于孟

津爲文王木主載之車中武王稱太子發奉先君東伐示不敢專也乃告司馬司徒司空遂興師太公左杖黃鉞右秉白旄誓衆渡河曰總爾行伍與爾舟楫後至者誅武王渡河中流白魚躍入王舟中武王俯取以祭旣渡有火自上而下至于王屋流爲鳥其色赤其聲魄云是時不期而會者八百諸侯皆曰紂可伐矣武王曰汝未知天命乃還師武王出見囑人蔭之於楹下左擁而右扇之天下聞之莫不懷其德紂之淫虐滋甚武王徧

告諸侯曰今商如是不可以不畢伐遂率戎車三百乘  
虎賁三千人甲士四萬五千人將行卜戰龜焦不兆著  
立而折筮又不吉風雨暴至折蓋太公因其形而制曲  
蓋今猶存遺制焉

羣臣盡懼太公曰枯骨朽草不逾人矣乃焚龜棄蓍帥  
衆先進武王從之行之日以兵忌東面而逆太戕魚辛

諫曰歲在北方不北征武王不從至汜而泛將涉河陽  
侯之波逆流而擊舟風雨晝暝相視不見武王瞋目而

擣之風霽而波靡十有三年一月戊午師渡孟津前歌  
河舞次于河朔諸侯以兵車會者四千乘武王乃作泰

誓以告于衆曰今商王受弗恭于天降災下民沈湎冒

通志 卷三下 三王紀三下 八

色敢行暴虐罪人以族官人以世惟宮室臺榭陂池侈  
服以殘害于爾萬姓焚炙忠良剝剔孕婦皇天震怒命  
我文考肅將天威大勳未集肆予小子發以爾友邦冢  
君觀政于商惟受罔有悛心同力度德同德度義受有  
臣億萬惟億萬心予有臣三千惟一心商罪貫盈天命  
誅之予弗順天厥罪惟鈞爾尙弼予一人永清四海明  
日王乃大巡六師明誓衆士曰今商王受自絕于天結  
怨于民斲朝涉之脛剖賢人之心崇信姦回放黜師保  
屏棄典刑囚奴正士郊社不修宗廟不享作奇技淫巧  
以悅婦人上帝弗順於是降喪爾其攷攷奉予一人恭

行天罰軍至河水紂使膠鬲候周師膠鬲見武王而問曰西伯將焉之王曰將之殷膠鬲曰何日至王曰甲子膠鬲去而雨大作皆曰不可行王曰吾令膠鬲以甲子報其主矣遂行王韞繫解五人御於前莫肯爲王結之皆曰臣所以事君非爲結韞也王乃釋旄鉞俯而自結二月甲子朝至于商郊牧野乃誓武王左杖黃鉞右秉白旄以麾曰嗟我友邦冢君司徒司馬司空亞旅師氏千夫長百夫長及庸蜀羌髡微盧彭濮人稱爾戈比爾于立爾矛予其誓王曰古人有言牝雞無晨牝雞之晨惟家之索今商王受惟婦言是用惟多罪逋逃之人是信是使俾暴虐于百姓以姦宄于商邑今予發惟恭行天之罰今日之事不愆于六步七步乃止齊焉夫子勛哉不愆于四伐五伐六伐七伐乃止齊焉勛哉夫子如虎如貔如熊如羆于商郊勛哉夫子爾所不勛其于爾躬有戮陳師牧野紂亦發兵七十萬以距之武王命師尙父與百夫致師以大卒馳紂師紂師雖衆無鬪心惟欲武王亟入武王馳之紂兵皆叛倒戈以開周師紂走而自燔武王持大白之旗以麾諸侯諸侯畢拜武王乃揖諸侯諸侯從王入商國商之百姓咸待于郊觀周師之入見畢公至商民曰是吾新君也商容曰非也視其

爲人嚴乎將有急色故君子臨事而懼見太公至民曰  
是吾新君也商容曰非也其人虎據而鷹趾當敵將衆  
威怒自倍見利卽前不顧其後故君子臨衆果於進退  
見周公至民曰是吾新君也商容曰其人忻忻休休志  
在除賊是非天子則周之相國也故聖人臨衆不惡而  
嚴是以知之見武王至民曰是吾新君也商容曰然聖  
人爲海內討惡見惡不怒見善不喜顏色相副是以知  
之商人皆再拜稽首武王亦答拜武王乃出復軍皇皇  
若天下之未定問太公曰奈商之士衆何對曰愛其人  
者兼其屋上之烏憎其人者盡其儲胥咸劉厥敵靡使  
有餘王曰不可問於召公對曰有罪者戮無辜者宥王  
曰不可問於周公對曰使各居其居田其田無變新舊  
惟仁是親王曰善哉明日除道及紂宮百夫荷罕旗以  
先驅叔振鐸奉陳常車周公旦秉大鉞畢公秉小鉞以  
夾武王散宜生太顛闔夭皆執劍以衛旣入立于社南  
毛叔鄭奉明水康叔封奉布茲召公奭贊采師尚父牽  
牲尹佚奉筴祝柴于上帝祈于社朝于湯廟乃出設奠  
於牧室迨至三代以古公爲太王公季爲王季諡其父  
曰文王祀先公以天子之禮改文王之十三年己卯爲  
元年以建子爲正月至於授民時巡狩祭享兼用夏正

建寅焉色尚赤社用栗葬用柏牲用騂以赤爲徽號朝  
燕服冕而元衣八寸爲尺其樂曰大武武王踐阼三日  
師尚父道丹書之言曰敬勝怠者昌怠勝敬者亡義勝  
欲者從欲勝義者凶以仁得之以仁守之其量百世以  
仁得之以不仁守之其量十世以不仁得之以不仁守  
之其世必傾王聞其言書之於席几鑑盥盤楹杖帶觴  
豆戶牖履劍弓矛皆爲銘焉微子持祭器造於軍門面  
縛銜璧輿襯武王親釋其縛受其璧而被之焚其襯禮  
而命之使復其位乃三分商之畿內封紂子武庚祿父  
爲諸侯以續商祀治商之餘民恐其變也命管叔尹鄘

通志

卷三下

三王紀三下

七

蔡叔尹衛相祿父居邶是爲三監乃命召公釋箕子之  
囚命畢公釋百姓之囚表商容之閭商容賢者也紂棄  
而不用隱於太行武王以爲三公固辭不受命命南宮  
适散鹿臺之錢發鉅橋之粟賑貧窮起幽側放傾宮之  
女命史佚展九鼎寶玉命閎夭封比干之墓命宗祝享  
祀于軍商民大悅曰王於死者猶封其墓況生者乎亡  
者猶表其閭況存者乎王於財也聚者猶散之肯復藉  
乎王於色也在者猶歸之肯復求乎武王已平商亂罷  
兵西歸四月至于豐丁未祀于周廟越三日庚戌柴望  
太畝武成薦俘馘于太廟封諸侯班宗彝分商之器物

武王追思先聖乃褒封神農之後於焦今陝州有焦城黃帝之

後於祝今淄州帝堯之後於蓊今幽州蓊縣帝舜之後於陳

宛今陳州宛邱大禹之後於杞今開封雍邱於是封功臣謀士以師

尚父為首封於營邱曰齊今齊州臨淄封弟周公旦於曲阜

曰魯今兗州仙源召公奭於燕今幽州叔鮮於管今鄭州管城叔度

於蔡今蔡州上蔡叔振鐸於曹今廣濟定陶叔武於郟今濮州雷澤叔

處於霍今晉州霍邑康叔封聃季載皆少未封其餘各以次

受封立七十一國封兄弟之國十五人同姓之國四十

人周之子孫不狂惑者皆得為諸侯惟周公雷佐周武

王徵九牧之君登幽之阜以望商邑王至于周自夜不

寐周公旦即王所曰曷為不寐王曰惟天不享商自發

未生於今六十年麋鹿在牧蜚鴻滿野天不享商乃今

有成我未定天保何暇寐我南望三塗北望岳鄙顧瞻

有河越視伊洛母遠天室營周居于洛而後去縱馬於

華山之陽放牛於桃林之野偃干戈振兵釋旅釁鼓旗

甲兵藏之府庫示天下不復用也武王已克商虛已而

問箕子商所以亡箕子不忍言乃問以天道箕子陳洪

範武王封之於朝鮮而不臣也箕子嘗朝周過故商虛

感宮室生禾黍而作麥秀之詩曰麥秀漸漸兮禾黍油

油彼狡童兮不與我好兮商民聞之皆流涕後二年武

王

王

通志 卷三下 三王紀三下 三

王有疾天下未集羣臣懼而之周公乃祓齊自爲質告太王王季文王欲身代武王占之曰吉周公納冊于

金縢之匱中明日有瘳武王自豐遷于鎬鎬在今永興鄂縣東南豐

文王都也自岐遷焉豐在豐水之南鎬在豐水之東豐鎬相去二十里在位七年崩年九

十三葬于畢封禪書云武王克商二年天下未定而崩皇甫謐曰武王元年乙酉六年庚寅崩皇

覽曰文王武王周公冢皆在長安鎬聚東社中也太子誦立是爲成王周人禘

嘗而郊稷祖文王而宗武王文武二廟蓋百世不遷云

臣謹按周以木德王天下又按皇甫謐曰武王伐紂之年夏四月乙卯祀于周廟將帥之士皆封諸侯者

四百人

通志 卷三下

三王紀三下

三

成王卽位元年周公位冢宰以天下初定王年少恐諸

侯畔周公攝政當國南面黼辰以朝諸侯成王冠周公

命史雍曰辭達而已勿多也史雍頌曰近於民遠於佞

近於義嗇於時惠於財任賢使能周公曰善成王朝于

祖廟以見侯諸管叔蔡叔羣弟疑周公攝政恐不利於

成王奄君告武庚祿父曰此百世之時也請舉事管蔡

挾武庚率奄淮夷叛周公奉王命興師東伐周公居東

二年罪人斯得誅武庚管叔放蔡叔與之車七乘徒七

十人降霍叔于庶人三年不齒遂定奄及淮夷東土以

寧諸侯復宗周分殷之餘民爲二以其一封微子啓代

殷後國於宋又以其一封康叔於衛又封季載於聃實  
周公之季弟也又封武王之四子於晉邗應韓晉國得  
嘉禾異畝合穎獻之成王成王以歸周公于兵所周公  
受禾東土旅天子之命作嘉禾周公遣使察民之有飢  
寒者獄訟之有冤者賢才之有幽滯者歸而以告周公  
周公於其君來朝也揖而問之百姓聞之曰何居之深  
而見之明也六年周公朝諸侯於明堂制禮作樂頒度  
量而天下大治交趾之南有越裳氏重三譯而獻白雉  
周公曰德澤不加君子不享其贄政令不施君子不臣  
其人譯曰吾國之黃耆曰天無烈風淫雨海不揚波三

通志

卷三下

三王紀三下

四

年矣意中國有聖人於是來朝周公致薦於宗廟使者  
迷其歸途周公錫以駟車五乘皆爲司南之制使者載  
之由扶南林邑海際暮年而至其國故指南車常爲先  
導示服遠人以正四方周公行政七年成王長周公反  
政北面就羣臣之位成王欲紹承武王之志乃使召公  
先相宅于洛邑周公復申視而卒營築謂之王城

今河南縣

也

是爲東都方千七百二十丈郭方十七里南繫于洛

水北因于邾山故亦謂之邾邠遷商之九鼎而居之卜  
世三十卜年七百乃制郊甸方六百里因西土爲方千  
里分爲百縣縣有四郡郡有鄙以東都爲天下之中四

方朝貢道里均焉周公又營成周今洛陽縣遷商之頑民初

周公避管蔡流言之難居東思公劉太王居豳之事以

比序已志及成王迎之攝政致太平其出入也一德不

回純似公劉太王太師因述其志主於豳公之事故爲

豳風成王旣伐東夷肅慎來賀王賜榮伯作賄肅慎之

命虞夏商之幣金爲三品或黃或白或赤或刀布或龜

貝周制以商通貨以賈易物太公立九府圜法周官有太府玉

府內府外府泉府天府職內職幣職金皆掌貨幣之官故曰九府黃金方寸重一斤錢

圜函方輕重以銖布帛廣二尺二寸爲幅長四丈爲疋

故曰寶於金利於刀流於泉布於布束於帛周公爲太

通志 卷三下 三王紀三下 五

師召公爲太保畢公爲太傅召公以周公嘗攝王政不

宜畱在王朝復列臣職其意不說周公陳已意作君奭

以告之衛康叔聃季載皆有馴行周公言於王舉康叔

爲司寇賜寶玉祭器以彰有德季載爲司空各效其能

餘五叔無官但有爵土而已以非材能者不可任以官也初降霍叔

爲庶人後三年復其舊封成王之時咸陽雨金末年四

月甲子王疾大漸懼太子釗之不任乃命召公畢公率

諸侯相太子而立之或言召太保奭苒伯彤伯畢公衛

侯毛公率百官相太子而立之形似姓 餘姬姓乙丑王崩在位

三十年通周公攝政爲三十三年鄭元曰成王二十八年或云四十七年

年或云四十七年

召公畢公以太子見于先王廟申告以文武爲王業之不易務節儉毋多欲以篤信臨之作顧命

臣謹按鄭元曰周公避居之初是武王崩後三年成王生十三年矣居東二年成王年十四矣迎周公返而居攝成王年十五矣七年致政成王年二十一矣故金縢注云文王十五生武王九十七而終終時武王八十三矣於文王受命爲七年後六年伐紂後二年有疾瘳後二年崩崩年九十三矣周公以武王崩後三年出五年秋復返居攝四年作康誥五年作召誥七年作洛誥伐紂至此十六年也作康誥時成王年十八洛誥時年二十一也卽政時年二十二然則成王以文王終明年生也又按王肅金縢注云文王十五而生武王九十七而終時受命九年武王八十三矣十三年伐紂明年有疾時年八十八矣九十三而崩以冬十二月其明年稱元年周公攝政遭流言作大誥而東征二年克武庚殺管叔三年而歸制禮作樂出入四年至六年而成七年營洛邑作康誥召誥洛誥致政成王然則文王崩之年成王已三歲武王八十一而生成王武王崩時成王已十三周公攝政七年而致政成王年二十也明年卽政年二十一

通志

卷三下

三王紀三下

共

也又按尚書大傳敘周公居攝曰一年救亂二年克商三年踐奄四年建侯于衛五年營成周六年制禮作樂七年致政又按左傳曰成王定鼎于郊鄆卜世三十卜年八百汲冢紀年曰西周二百五十七年通東周徧合七百之數三統歷西周三百五十二年并東周八百餘年

康王

元年癸亥

即位徧告諸侯宣告文武之業以申之乃朝

諸侯於艷宮成康之際天下安寧刑錯四十餘年不用康王命作策畢公分居里成周郊作畢命康王在位二十六年崩年五十七子昭王瑕立

通志

卷三下

三王紀三下

七

昭王之時

元年己丑

有光五色貫紫微井水溢是時王道衰

諸侯擅相征伐荆楚不朝王南征濟漢水漢濱之人以膠船進王中流膠液船解王及祭公沒焉其崩不赴告諱之也在位五十一年

皇甫謐曰在位二十二年三十五

子穆王滿立

穆王卽位

元年庚辰

春秋已五十矣王室衰微穆王閔文武

之道缺乃命伯冏申戒太僕作冏命王寵盛伯之女盛姬爲之築重璧之臺怠於政治徐夷作亂帥九夷以伐宗周西至河上穆王患其熾也乃分東之諸侯命徐子主之徐子嬴姓處潢池之東地方五百里行仁義通溝陳蔡之間欲舟行上國得朱弓朱矢以爲天瑞自號偃

王陸地而朝者三十六國臯陶之裔曰造父以善御幸於穆王王得八駿日行千里使造父御之欲車轍馬跡周於四荒八極西與王母宴于瑤池作白雲黃竹之歌樂而忘歸聞徐偃王僭竊復御八駿長驅而還使造父告楚令伐徐王孫厲謂楚子曰徐王好行仁義其志大矣君若不伐楚必事徐楚子曰若有道不可伐對曰大伐小疆伐弱猶石之投卵虎之噬豚也楚子於是伐徐偃王不忍鬪故敗乃北走彭城東山下民從之者以萬計因名其山曰徐山徐子將死曰吾爲不忍以至於此王將征犬戎祭公諫父諫曰先王耀德不觀兵夫兵戢而時動動則威觀則玩玩則無震武王致戎于商牧非務武也勤恤民隱而除其害自其君大畢伯士之終也大畢伯士犬戎氏以其職來王今天子曰予必不享戎氏之二君犬戎氏以無乃廢先王之訓而王幾頓乎王不聽遂征之獲四白狼四白鹿以歸遷戎于太原自是荒服不至王享國百年耄荒諸侯有不睦者甫侯爲相言於王修刑辟命之曰甫刑王起六師至于九江伐楚會諸侯於塗山在位五十五年崩年百五歲子共王繫扈立共亦作恭共王元年乙亥共王游於涇上密康公從有三女犇之其母曰必致之王夫獸三爲羣人三爲衆女三爲粲夫粲物

通志

卷三下

三王紀三下

六

之美也衆以美物歸女而何德以堪之王猶不堪况爾小醜乎小醜備物終必亡康公不獻一年王滅密共王

能庇昭穆之闕在位十年崩皇甫謐曰在位二十五年年八十四或云在位十二年

年子懿王薨立

懿王元年乙酉之時王室遂微詩人作刺紀侯譖齊哀公于

王王烹之王嘗居大邱其地與鎬京相近有離宮在焉

懿王在位二十五年崩皇甫謐曰在位二十年年五十九共王弟辟方立

是爲孝王

孝王元年庚戌之時大雨雹牛馬死江漢水召秦非子使主

馬汧渭之閒馬大蕃息孝王在位十五年崩年六十五

通志 卷三下 三王紀三下 充

懿王子變立是爲夷王

夷王元年乙丑始下堂而見諸侯荒服不至命虢公帥六師

伐太原之戎至俞泉獲馬千疋在位十五年崩或云六十年

年六十子胡立是爲厲王

厲王元年庚辰暴虐楚熊渠畏其伐去三子王號淮夷入寇

王命虢仲征之不克王好利近榮夷公大夫芮良夫諫

曰王室其將卑乎夫榮公好專利而不知大難夫利百

物之所生也天地之所載也而有專之其多害矣匹夫

專利猶謂之盜王而行之其歸鮮矣榮公若用周必敗

王不聽卒以榮公爲卿士諸侯不享王行暴虐侈傲國

人謗之召穆公虎諫曰民不堪命矣王怒得衛巫使監  
謗者以告則殺之諸侯不朝三十四年王益嚴國人莫  
敢言道路以目王喜告召公曰吾能弭謗矣召公曰是  
郭之也防民之口甚於防水水壅而潰傷人必多民亦  
加之是故爲水者決之使導爲民者宣之使言故天子  
聽政使公卿列士獻詩瞽獻典史獻書師箴瞽賦矇誦  
矇無眸子矇有百工諫庶人傳語近臣盡規親戚補察  
眸子而無見瞽史教誨者艾修之而後王斟酌焉是以事行而不悖  
民之有口也猶土之有山川也財用於是乎出猶其有  
原隰衍沃也衣食於是乎生日之宣言也善敗於是乎

通志

卷三下

三王紀三下

五

興行善而備敗所以產財用衣食者也夫民慮之於心  
宣之於口成而行之若壅其口其與能幾何王不聽於

是國人莫敢出言三年乃相與畔襲王王出奔于虢

晉今

州霍邑漢  
爲竟縣

太子靜匿召公之家國人圍之召公曰昔吾

驟諫王王不從以及此難今殺王太子王其以我爲讎  
而懟怒乎乃以其子代王太子太子竟得脫召公與周  
公二相行政號曰共和厲王在位四十年流于虢并共  
和十四年通五十四年崩于虢

或云在位三十七年太  
通共和爲五十一年太

子靜長於召公之家二相乃立之是爲宣王

臣謹按共和者周召二公共行政而無相違戾者也

汲冢紀年及魯連子曰共國之伯名和行天子政

宣王元年周召二相輔王法文武成康之遺風王命召公虎平淮夷命皇父整六師程伯休父爲司馬征徐戎命召伯定南邦封申伯以褒其功命蹶父撫北土封韓侯爲諸侯長命仲山甫出使喻王之德意于四方乃城東方以定齊邑海內翕然向風諸侯復宗周尹吉甫作詩以美之王不籍千畝虢文公諫曰民之大事在農故稷爲大官今欲修先王之緒而棄其大功可乎王不聽大旱自二年不雨至于六年十二年春魯武公與子括

戲來朝王愛戲命魯舍括而立戲仲山甫諫不聽卒立

通志

卷三下

三王紀三下

三

戲是爲魯懿公二十二年王晏起姜后脫簪珥待罪於永巷使其傅母言於王曰使王好色而忘德失禮而晏起自臣妾始敢請罪王曰寡人之過也自是早朝晏罷卒成中興之業二十一年魯括之子伯御殺懿公而自立三十年有馬化爲人有兔舞乎鎬京三十二年王伐魯殺伯御立懿公之弟稱是爲孝公諸侯自是不睦王欲得國子之能訓導諸侯者樊穆仲曰魯侯肅恭神明詢事耆老賦事行刑必問遺訓而咨於故實王曰然則能訓治其民矣乃命孝公於夷宮三十二年有馬化爲狐三十四年王征獫狁三十八年王伐條戎奔戎王師

敗績王十九年與姜氏之戎戰于千畝王師敗績王御  
奄父曰公仲脫王奄父者趙造父六世孫王既喪南國  
之師乃料民於太原仲由甫諫曰古者不料民而知其  
多少且無故料民天之所惡也王卒料之周道復衰四  
十一年王征申戎破之四十六年崩初王將殺杜伯而  
非其罪杜伯之友左儒爭之于王九復不許王曰汝別  
君而異友也儒曰君道友逆則順君以誅友友道君逆  
則帥友以違君王怒曰易而言則生不易則死儒曰士  
不枉義以從死不易言以求生臣能明君之過以正杜  
伯之無罪王殺杜伯左儒死之後宣王畋于圃田見杜  
伯執弓矢射王王竟崩于田所子幽王宮涅立

通志

卷三下

三王紀三下

三

臣謹按史記自共和之後始書年紀甲共和之前則  
無年也皇甫謐之徒及歷家自羲皇以來各有年代  
閒或異同臣今亦從之而注甲歷及異同於其下聊  
備觀采然皆不足取信也共和始於庚申終於癸酉  
盡十四年宣王元年始於甲戌自此以後年數具在  
甲歷可推然仲尼紀年始於魯隱蓋本東周

幽王二年西周三川皆震

三川者涇渭洛皆秦地

伯陽

甫曰周將亡矣

伯陽甫周柱下史老子也

夫天地之氣下失其序若

過其序民亂之也陽伏而不能出陰迫而不能蒸於是

有地震今三川寶震是陽失其所而填陰也陽失而在陰原必塞原塞國必亡昔伊洛竭而夏亡河竭而商亡今周德若工代之季矣其川原又塞塞必竭夫國必依山川山崩川竭亡國之徵也若國亡不過十年數之紀也是歲三川竭岐山崩初王伐褒褒人獻褒姒王惑之褒姒年十四與虢石父比而譖申后及太子宜臼大夫尹氏及祭公復導王爲非六年王命伯士伐六濟之戎王師敗績伯士死之是時四夷父侵戎圍犬邱秦世父擊之爲戎所虜歲餘復歸之八年王以鄭伯友爲司徒和集其民周人便之是爲鄭桓公九年王廢申后及宜

通志

卷三下

三王紀三下

三

臼以褒姒爲后立其子伯服爲太子宜臼奔申太史伯陽曰禍成矣無可奈何褒姒不好笑王說之萬方不能得周制有寇至則舉烽燧大鼓諸侯悉至王乃大舉烽燧諸侯至而無寇褒姒乃大笑王爲是數舉烽燧其後不信諸侯益亦不至褒姒好聞裂繒之聲王發繒裂之以適其意虢石父佞而好利王以爲卿士朝多亂政諸侯不享王室騷然於是爲太室之盟戎狄叛之十一年王欲殺宜臼求之於申申侯弗予王伐之申侯與郟人召西夷犬戎攻王王舉烽燧徵兵兵莫至遂殺幽王驪山下戲水虜褒姒并殺鄭桓公盡取周賂而去諸侯卽

申共立宜曰是爲平王以奉周祀是時秦襄公衛武公將兵救周平戎鄭人立桓公子掘突是爲武公幽王末年日暈再重內赤外青有一黑畫上下通在日中牛化爲虎羊化爲狼幽王在位十一年

臣謹按自武王元年己卯至厲王四十年己未二百八十一年自共和元年庚申至幽王十一年庚午七十一年共三百五十二年爲西周又按幽王旣死鄭武公晉文侯輔平王東遷號公立伯服是爲攜王故左傳曰攜王妣命杜預曰攜王伯服也古文作伯盤攜王之立國人不順未經年而廢之又按汲冢紀年曰幽王死申侯魯侯許文公立平王於申號公翰立王子余二王竝立余爲晉文侯所殺

通志

卷三下

三王紀三下

五

臣又按周太史伯陽讀史記曰周亡矣昔自夏后氏之衰也有二神龍止於夏庭而言曰予褒之二君夏帝卜殺之與去之與止之莫吉卜請其禱而藏之乃吉禱龍所吐沫也於是布幣而策告之龍亡其禱在櫝而藏之夏亡傳其器于商商亡傳其器于周比三代莫敢發厲王末年發而觀之禱流于庭不可除也厲王使婦人羸而譟之禱化爲黑龍入王後宮後宮之童妾旣齷而遭之旣笄而孕無夫而生子懼而棄之宣王

之時童謠曰燮弧箕服實亡周國

燮弧箕服木名服矢房有

夫婦賣是器者宣王使執而戮之逃於道見鄉者後  
宮所棄乃女子也夫婦哀其夜號而收之遂奔褒國  
褒人有罪請入是女以贖以其出於褒故謂之褒姒  
姒褒姓也

平王卽位當幽王之亡豐鎬蕩然大戎侵逼近郊於是  
晉文侯鄭武公秦襄公夾輔平王于申而遷于王城卽  
成王所營之東都也王勞晉鄭而賜之盟曰世世子孫  
無相害也命晉文侯爲侯伯賜桓鬯圭瓚封秦襄公爲  
諸侯賜岐以西之地秦始通于上國命鄭武公爲司徒

通志

卷三下

三王紀三下

三

鄭於是取鄆虢十邑之地而遷焉是爲新鄭自是齊楚  
秦晉始大政由方伯天子微弱戎狄交居乎諸夏自隴  
以東及乎伊洛與戎雜居故渭首有狄原封冀之戎涇  
北有義渠之戎洛川有大荔之戎渭南有驪戎伊洛閒  
有揚拒泉臯之戎潁首以西有蠻氏之戎實賴秦人爲  
西堡障故秦文公伐戎收周之餘民而得岐內之地自  
岐以東獻之周周平王四十九年魯隱公元年也五十  
一年崩太子洩父早死立其子林是爲桓王

桓王平王之孫也三年鄭莊公來朝王不禮焉莊公者  
桓公之孫武公之子也桓公死於幽王之難武公輔平

王東遷莊公欲脩祖禰之好而王不禮之鄭始怨周五年鄭與魯易許田許田者天子有事于泰山鄭人來相事之田也今易於魯示忘於周也十三年王奪鄭伯政鄭伯不朝王伐鄭鄭人禦之矢中王肩二十三年桓王崩子伋立是爲莊王

莊王二年十月辛卯朔日有食之四年周公黑肩欲殺王而立王子克王子克者莊王之弟子儀也周大夫辛伯告王王殺黑肩克奔燕莊王在位十五年崩子胡齊立是爲僖王

僖王

僖亦作釐

三年春諸侯會于鄆齊桓公始霸楚亦始大

通志

卷三下

三王紀三下

三

五年崩子閔立是爲惠王

閔一作諒

惠王二年秋周大夫蔦國邊伯詹父子禽祝跪奉莊王之寵子子頹以伐王王出奔溫蘇子奉子頹奔衛衛師燕師伐周立子頹爲王設享禮作樂徧及六代之舞三年鄭伯和王室不克遂以王居于櫟四年虢公鄭伯同伐王城殺子頹及五大夫而納王十年王使召伯廖賜齊桓公命爲侯伯二十四年冬王崩太子鄭畏太叔帶之難不發喪而告難于齊二十五年春諸侯盟于洮謀王室也襄王定位而後發喪春秋書十二月丁未從告也是歲周有白兔舞于市

臣謹按惠王十五年七月有神降于莘王問內史過曰何神也對曰昭王娶於房曰房后有爽德協於丹朱丹朱憑身以儀之生穆王實照臨周之子孫今在虢土虢君無道其亡乎王曰吾其若之何對曰祝史奉牲以獻焉而勿祈也虢公使祝史請王焉過聞之曰虢亡必矣

襄王卽位襄王之母早死陳嬀繼之實惠后生叔帶有寵於惠王王欲立之襄王三年王使召武公及內史過賜晉惠公命惠公執玉情過歸告王曰晉侯不亡必無後夏叔帶召戎伐京師入王城焚東門秦晉伐戎以救

通志

卷三下

三王紀三下

三

周是歲雨金于晉四年秋叔帶奔齊是歲星晝隕于秦有聲十二年宋襄公霸十四年王以富辰之言召叔帶自齊歸于京師五年爲戎難齊帥諸侯戍周初平王東遷辛有適伊川見被髮祭於野者曰不及百年此其戎乎其禮先亡矣秋秦晉遷陸渾之戎于伊川十六年秦穆公霸狄狄人奉叔帶攻王王出適鄭居于汜子帶自立爲王居于温十七年晉文公用狐偃之言納襄王殺叔帶王賜晉文公南陽之田二十年晉楚戰于城濮楚師敗績五月王命晉侯爲侯伯於是晉文公始霸冬王狩於河陽以勞晉師二十九年秦用由余謀伐戎益國

十二開地千里王使召公過錫穆公以金鼓三十三年崩子壬臣立是爲頃王

頃王在位六年崩周公闕與王孫蘇爭政故不赴于諸侯是歲有星孛入于北斗

匡王元年六月辛丑朔日有食之三年秋甘歌敗戎于邾垂六年垂子瑜立是爲定王史記云弟瑜立

定王元年春楚子伐陸渾之戎遂觀兵于周疆王使王孫滿勞楚子楚子問鼎之大小輕重滿曰在德不在鼎昔成王定鼎于郊鄆卜世三十卜年七百周德雖衰天命未改鼎之輕重未可問也五年河徙六年王使單襄

通志

卷三下

三王紀三下

三

公聘于宋八年使劉康公聘于魯十四年成周宣榭火十七年劉康公伐茅戎敗績二十一年崩子夷立是爲簡王

簡王八年春魯成公朝周王使劉康公成肅公會晉厲公伐秦十二年尹武公單襄公及諸侯伐鄭十三年春晉人狄厲公逆襄公之會孫周于京師而立之是爲悼公十四年崩子泄心立是爲靈王

靈王生而有髭髯甚神聖東遷之後王室衰微至靈王始振二十一年十一月庚子孔子生二十七年王崩次子貴立是爲景王

臣謹按皇覽曰靈王冢在河南城西南相亭西周山上蓋以靈王生而有髭又神聖故諡靈王其冢民祀之不絕又按馬總亦曰靈王生而有髭十六年太子晉登仙

景王八年春魯舍中軍卑公室也四分公室季氏擇二仲叔各一皆盡征之而貢于公二十五年崩景王太子早卒王子朝以庶長景王愛而欲立之未及而崩王子丐之黨爭立國人立王子猛是爲悼王

臣謹按皇覽曰景王冢在洛陽太倉中秦封呂不韋洛陽十萬戶故大其城并圍景王冢

通志

卷三下

三王紀三下

五

悼王立未及一年王子朝攻殺之晉人攻子朝而立句是爲敬王敬王者悼王之母弟也

敬王元年晉人立王王子朝自立王不得入居于澤四年晉率諸侯納王于周尹氏召伯毛伯以子朝奔楚十年王以子朝之亂王城墮壞欲遷于成周八月王使富辛石張請城于晉冬晉魏舒合諸侯之師城成周十四年春王人晉侯會諸侯于召陵謀伐楚十五年王人殺子朝于楚十六年周儋翩率王子朝之徒因鄭人作亂伐周六邑十二月天王處于姑蓆十七年尹氏復黨儋翩爲亂夏單武公劉桓公敗尹氏于窮谷冬單子劉子

逆王十一月王入于王城十八年春單子劉子討儂之  
黨以定王室三十九年春魯人西狩獲麟四十一年夏

四月己丑孔子卒四十三年王崩子仁立是爲元王史記

四十二年敬王崩皇  
甫謚云四十四年崩

元王在位八年崩子介立是爲貞定王

貞定王亦曰定王十六年三晉滅智伯分其地二十八年王

崩太子去疾立是爲哀王

哀王在位三月弟叔襲殺哀王而自立是爲思王

思王在位五月少弟嵬攻殺思王而自立是爲考王嵬

作隗此三王皆  
定王之子也

通志 卷三下 三王紀三下

考王卽位封其弟于河南是爲桓公以續周公之職號

西周桓公桓公卒子威公立威公卒子惠公立惠公卒

子武公立武公生共太子早死立公子咎爲太子初惠

公有二子封其少子於鞏以奉王號東周惠公十五年

王崩子午立是爲威烈王

威烈王二十三年九鼎震或作二十一年王命晉大夫韓趙魏

爲諸侯二十四年王崩子驕立是爲安王驕一作龍

安王十六年初命齊太公田和爲諸侯二十三年齊康

公薨田氏遂篡齊而絕其祀二十六年韓哀侯滅鄭韓

趙魏共廢晉靖公爲家人三分其地晉是以不祀王崩

子喜立是爲烈王

烈王亦曰夷烈王二年周太史儋見秦獻公曰始周與秦國

合而別別五百載復合周孝王封秦仲爲附庸是與周別自秦仲至孝公五百年孝公

疆大周顯王入秦致伯是復合也合十七歲而霸王者出焉秦武王昭襄王皆霸王

至始皇而十七年王崩弟扁立是爲顯王

顯王亦曰顯聖王五年秦獻公敗三晉于石門斬首六萬天

子錫以黼黻九年致文武胙于秦孝公十六年齊威王

最疆始稱王以號令天下二十五年秦孝公會諸侯朝

周二十六年天子致伯于秦孝公三十三年賀秦惠王

卽位魏惠王卑禮厚幣招賢鄒衍淳于髡孟軻之徒皆

通志 卷三下 三王紀三下

至三十五年致文武胙於秦惠王蘇秦說燕與趙合從

以拒秦三十六年蘇秦說趙肅侯請六國合從以拒秦

蘇秦相六國爲從約長張儀入秦秦惠文王以爲客卿

三十七年秦使犀首期齊魏共伐趙趙以責蘇秦蘇秦

去趙而從約皆解四十一年張儀說魏王盡以上郡十

五縣入于秦秦以張儀爲相四十四年秦惠文王始稱

王其後諸侯皆爲王四十八年王崩子定立是爲慎靚

王

慎靚王亦曰順靜王三年趙楚韓魏燕共伐秦攻函谷關不

勝皆敗走四年張儀復相秦敗韓趙兵于脩魚斬首八

萬諸侯震恐六年王崩子延立是爲赧王

赧王之時東西周分治赧王復居王城號西周周桓公之孫惠公居洛陽爲東周或言趙成侯八年成侯與韓分周以爲兩赧王雖居天子之位爲諸侯所侵與家人無異多負於人無以歸之乃止臺逃避周人名其臺曰

逃債臺八年東周與西周戰韓救西周或爲東周說韓

王曰西周故天子之國多名器重寶王案兵毋出可以

德東周而西周之寶必可盡矣

史記於此下闕文

後楚圍雍氏

韓徵甲與粟於東周君東周君恐召蘇代而告之代曰

君何忠於是臣能使韓毋徵甲粟又能爲君得高都

韓邑

通志

卷三下

三王紀三下

三

也周君曰子苟能請以國聽子代見韓相國曰楚圍雍

氏期三月也今五月不能拔是楚病也今相國乃徵甲

粟於周是告楚病也相國曰善使者行矣代曰何不與

周高都相國大怒曰吾不賦甲與粟於周亦已多矣何

故與周高都邪代曰與周高都是周折而入韓也秦聞

之必大怒忿周卽不通周使是以敝高都得完周也曷

爲不與相國曰善果與周高都三十四年蘇厲謂周君

曰秦破韓魏扑師武

扑一作仆武韓將名

北取趙藺離石者皆白

起也是善用兵又有天命今將兵出塞攻梁梁破則周

危矣何不令人說白起曰楚有養由基者善射去楊葉

百步而射之百發百中觀者數千人皆曰善射有一人立其旁曰善可教射矣養由基怒釋弓楡劍曰客安能教我射乎客曰吾非能教子支左詘右也夫去柳葉百步而射之百發百中不以善息少焉氣衰力倦弓撥矢鉤一發不中百發盡息今破韓魏扑師武北取趙藺離石者公之功多矣今又將兵出塞過兩周倍韓攻梁一舉不得前功盡棄公不如稱病而毋出五十九年秦取韓陽城負黍西周恐乃倍秦與諸侯約從將天下銳師出伊闕攻秦令秦毋得通陽城秦昭王怒使將軍繆攻西周西周君奔秦頓首受罪盡獻其邑三十六口三萬

通志

卷三下

三王紀三下

三

秦受其獻歸其君於周周君王赧卒

宋忠曰諡西周武公

周民遂

東亡秦取九鼎寶器而遷西周公於愚狐

愚即憚字愚狐聚在洛陽

南百五十里梁新城之間

後七年秦莊襄王滅東西周兩周皆入于

秦周是以不祀秦以其地爲三川郡漢興九十有餘載天子將封泰山東巡狩至河南求周苗裔封其後嘉三十里地號曰周子南君比列侯以奉其先祀實武帝元鼎四年也

右周之世起武王元年己卯或曰戊寅至赧王

五十九年乙巳三十一世三十七王八百六十

七年而亡

臣謹按八百六十七年之間三百五十二年爲西周  
五百十五年爲東周也又按四百年在春秋前二百  
四十二年在春秋內二百二十五年在春秋後合八  
百六十七年

通志



雙三下

三五紀三下

言



通志卷第三下



